

**Bàu Lem tiaq  
Jon  
Achih Biac Chuaq Jêxu Broq wa Hnài  
Bàu Patô Adroi**

*Hiniq wa Bàu Xèm Da Sech:*  
Hiniq sech cô: Jon.

*Mangai Achih wa Hanam Achih:*  
Jon mangai achih sech cô. Adroi nèh haq mangai hóc tiaq Chuaq Jêxu. Haq achih tiaq bàu ta Sech Biac Baxèm. Haq achih hiniq can 'ngah wa can rih. Haq hadai bahmàng mangai biac nan xa da Chuaq Jêxu. Hiniq Jon: "Chuaq Loq Xa-öch;" "Chuaq am dech."

Jon khoi canao loq can rih da mangai Yothaiq èh bàc yàng achih hlài biac aih. Bàc bàu haq achih aih taiq i mangai ngan hnoq biac aih broq loh. Sech cô khoi achih hanam 85 Atiq C.

*Bàu Anoi:*  
Jon achih sech cô taiq haq enh dìq ca mangai canao loq ca Chuaq Jêxu wa jah dèch claih: "Mahaq khoi achih biac cô waq ca pì lùì Chuaq Jêxu, Haq Chuaq Crich, Con da Boc Plình, wa nhò manoh lùì aih, oh daq jah rih ta hiniq Haq". (Jon 20:31).

*Rìm 'Nat:*  
1. Bàu Baxèm: 1:1-18  
2. Biac Baxèm Broq da Chuaq Jêxu: 1:19-51  
3. Biac Broq da Chuaq Jêxu: Bàu Halac wa Bàu Hnài: 2:1—11:57

4. Biac nan xa da Chuaq Jêxu: 12:1—19:42
5. Can Rìh Hlài: 20:1-29
6. Bàu gleq achìh: 20:30-31
7. Bàu Pulùch: 21:1-25

### *Bàu Wìh Wìa Chac Hamac*

<sup>1</sup> Calah baxèm i Bàu, Bàu cô òi ti Boc Plình. Bàu cô raq Boc Plình. <sup>2</sup> Enh jò baxèm Haq khi òi pajùm ti Boc Plình. <sup>3</sup> Calah baxèm, Haq khi broq rìm hiniq, enh gùng ca Haq, ùh i ca cleq ma wìa ðeh. <sup>4</sup> Haq raq xèm can rìh wa can rìh cô aih can 'ngah am ca con mangai. <sup>5</sup> 'Nghah cô xreo òi ti clam, clam ùh ta'blêq ca 'Nghah.

<sup>6</sup> I mòiq ngai Boc Plình thê lam trùh, hiniq haq Jon. <sup>7</sup> Mangai aih trùh anoi hlài ca wì biac Can 'Nghah, ðòiq ðìq ðõng mangai leq tàng haq, èh jah lùì. <sup>8</sup> Haq ùh xài Can 'Nghah cô, mahaq haq lam anoi hlài ca wì biac Can 'Nghah.

<sup>9</sup> Can 'Nghah cô, Haq Can 'Nghah joq 'nàng khi trùh crõng taneh, jah xreo 'ngah rìm ngai. <sup>10</sup> Haq khi òi ta crõng taneh ma cla Haq khi broq, mahaq mangai òi crõng taneh ùh canao loq ca Haq. <sup>11</sup> Haq khi trùh ðeh ta gùng, mahaq con mangai ùh ðìh yõc Haq. <sup>12</sup> Mahaq mangai leq ma nhàn yõc Haq, aih lùì hiniq Haq, Haq am ca wì cwiang wìh wìa con caiq Boc Plình. <sup>13</sup> Wì aih ùh xài xa-ông nhò mahem, ùh xài tiaq trong chac hamac, ùh xài tiaq trong manoh con mangai ma enh, mahaq Boc Plình ma xa-ông.

<sup>14</sup> Bàu cô khi wìh wìa chac hamac òi ta'ne bèn, bình halùih biac am ðech wa bàu joq 'nàng. Bèn khi ngan hnoq 'ngah 'ngai lem lình enh Haq, joq

'nàng 'ngah lem loh enh Con Mòiḡ trùh enh nòi Baḡ.

<sup>15</sup> Jon ta'mon hlài biac Haḡ. Jon creο doi 'màng cô: “Aih Mangai au khoi doi, Haḡ trùh atìḡ ca au. Haḡ yi càn ca au, ma jah 'màng aih Haḡ i adroi ca au.” <sup>16</sup> Biac am dech khoi ùc bình òi enh dalam ca Haḡ, Haḡ khoi ùc bình ca bèn diḡ đōng, am dech rai èh rai bàc. <sup>17</sup> Joḡ 'nàng 'màng aih, Ranenh khoi am ca bèn nhò Môise, mahaḡ Chuaḡ Jêxu Crich khoi am ca bèn biac am dech wa bàu joḡ 'nàng. <sup>18</sup> Ûh i cabô ma khoi hnoḡ Boc Plình enh gùng ca Con Mòiḡ òi dèh ti manoh Baḡ. Haḡ raḡ khoi patô am ca bèn loḡ ca Baḡ.

*Bàu Anoi Hlài Da Jon 'Baptit*

*(Mat 3:1-12; Mỗc 1:2-8; Luc 3:15-17)*

<sup>19</sup> Cô bàu Jon anoi hlài jò mangai Yothaiḡ thê 'bài pajàu wa mangai Lêwi enh Jê-ru-sa-lem lam trùh bòch haḡ: “Ìh cabô?” <sup>20</sup> Jon anoi hlài ma ro, ùh cadoc hangah cleḡ, haḡ doi: “Au ùh xài Crich.”

<sup>21</sup> Wì bòch haḡ: “Ta 'màng aih, ìh cabô? Ìh Êli ùh xài?”

Haḡ doi: “Ùh xài.”

“Ìh ajoḡ Mangai capoch thai Boc Plình nhèn ma gòm ùh?”

Jon tèo: “Ùh xài.”

<sup>22</sup> Wì bòch tam haḡ: “Ta 'màng aih, ìh cabô? Doi beḡ, òiḡ nhèn anoi hlài ca wì ma thê nhèn bòch ìh. Cla ìh doi daḡeh cabô?”

<sup>23</sup> Haq tèo: “Au bàu mangai creò ta ðùng hawit phai broq ma jang trong Chuaq.”<sup>☆</sup> 'Màng ca pajàu Êsai khoi doi.

<sup>24</sup> Wì ma lam bòch Jon, aih mangai Pha-ri-si khoi thê trùh. <sup>25</sup> Wì bòch haq: “Gleq ma jah ìh 'baptem tàng ìh ùh xài Crich, loq Êli, loq Mangai capoch thai Boc Plình aih?”

<sup>26</sup> Jon doi: “Au broq 'baptem xam diac, mahaq i Mòiç Ngai yòng òi ta'ne pì, pì ùh loq ca Haq. <sup>27</sup> Haq trùh ta cô atiq ca au, mahaq au ùh ðang ðòiq ðòih caxi jai Haq.”

<sup>28</sup> Wì anoi bìac cô òi ta 'Bê-tha-ni pah tau cròng diac Jôðan, nòi Jon ma 'baptem.

<sup>29</sup> Trùh hì ma atiq, Jon hnoq Chuaq Jêxu lam trùh ti haq. Haq doi: “Tau, Trìu Con Boc Plình, aih Haq ma pòç yòç ðiq ðòng tôiq lôi con mangai cròng taneh. <sup>30</sup> Mangai cô, aih Haq ma au khoi doi ca pì. Haq trùh ta cô atiq ca au. Haq broq càn yi hnao ca au, ma jah 'màng aih, au 'nhòç i, Haq khoi i. <sup>31</sup> Adroi, au ùh loq ca Haq, mahaq manàiq cô au khoi trùh ta cô broq 'baptem xam diac ðòiq patô Haq ca jàn Is-ra-ên.”

<sup>32</sup> Jon anoi hlài 'màng cô hòm: “Au khoi hnoq Yiang Hadròih tiàh ca chìm trù, loh enh plình jràp òi ti Haq. <sup>33</sup> Adroi au ùh loq ca Haq, mahaq Chuaq ma thê au broq 'baptem xam diac, Haq doi ca au: ‘Jò ìh hnoq Yiang Hadròih loh, jràp òi ti mangai leq, Mangai aih raq broq 'baptem xam Yiang Hadròih.’ <sup>34</sup> Au khoi hnoq 'màng cô, ma jah au anoi hlài, Mangai cô Haq Con Calô Boc Plình.”

---

<sup>☆</sup> **1:23** 1:23 Êsai 40:3.

*Mangai Hõc Tiaq ma Adroi Baxèm*

<sup>35</sup> Hì da èh, jò Jon yòng ti baiq ngai, mangai hõc tiaq haq, <sup>36</sup> haq hnoq Chuaq Jêxu lam ti trong, haq doi ca wa: “Ngan tau, Triu Con Boc Plinh!”

<sup>37</sup> Baiq ngai mangai hõc tiaq tàng bàu aih, hi lam tiaq Chuaq Jêxu. <sup>38</sup> Chuaq Jêxu wìh hlài ngan wa tiaq Haq, bòch: “Chòp chaq cleq?”

Wa tèo: “Rabi,” aih Thài, “Ìh òi ta leq?”

<sup>39</sup> Haq doi: “Lam ngan beq!”

'Màng aih, wa lam hnoq nòi Haq òi. Jò aih khoi jah pôn jò chiu. 'Màng aih wa òi hlài ti Haq trom hì aih.

<sup>40</sup> Wa baiq ngai ma tàng Jon doi wa tiaq Chuaq Jêxu, mòi q ngai aih Anrê, oh Simôn Pêtrô.

<sup>41</sup> Bìac baxèm haq broq, aih haq lam chaq dèh daq, aih Simôn. Haq doi: “Bèn khoi hnoq Mangai Mèsi” Aih hiniq, Crich. <sup>42</sup> Haq 'ràng Simôn trùh ti Chuaq Jêxu.

Chuaq Jêxu ngan haq, èh doi ca haq: “Ìh Simôn, con Jon, pàng cô ta èh jah creò hiniq ìh, Sêpha.” (Aih Pêtrô, i hiniq hmu).

<sup>43</sup> Loh hì atìq, Chuaq Jêxu enh lam Ga-li-lê chaq hnoq Philip, Haq doi: “Lam tiaq Au beq.”

<sup>44</sup> Philip haq mangai 'Bêt-sai-đa, aih phòq da Anrê wa Pêtrô. <sup>45</sup> Philip glàm Nê-tha-nên, doi ca haq: “Nhèn khoi hnoq Mangai ma Môise khoi achìh ta sech Ranenh, wa wì mangai capoch thai Boc Plinh hadai khoi achìh, aih Chuaq Jêxu òi Na-xa-ret con Jôsep.”

<sup>46</sup> Nê-tha-nên padreo bàu doi: “Ma i hiniq cleq lem jah loh enh Na-xa-ret?”

Philip doi: “Lam ngan beq!”

<sup>47</sup> Chuaq Jêxu hnoq Nê-tha-nên lam trùh ti Haq, Chuaq Jêxu doi: “Ngan cô, mòiq ngai Is-ra-ên joq 'nàng, mangai ma ùh i bìac amòng cleq òi enh dalam manoh haq.”

<sup>48</sup> Nê-tha-nên doi ca Haq: “Gleq Ìh ma loq ca au?”

Chuaq Jêxu tèo: “Jò Philip 'nhòq creo ìh, Au khoi hnoq ìh òi ti yàp long póc.”

<sup>49</sup> Nê-tha-nên doi: “Ôi Thài, Ìh joq Con Calô Boc Plình. Ìh Bùa Diac Is-ra-ên.”

<sup>50</sup> Chuaq Jêxu doi: “Ma jah 'màng aih, Au khoi anoi ca ìh, Au hnoq ìh òi ti yàp long póc, èh ìh i manoh lùì Au. Ìh jah hnoq ca bìac yi càn, yi hnao bìac aih!” <sup>51</sup> Chuaq Jêxu doi ca haq: “Jòq 'nàng, Au anoi ca pì, pì jah hnoq 'plình tapèh, 'bình plình jah tóc loh ti’<sup>☆</sup> Con Mangai.”

## 2

### *Ban Ớng Mai ta Cana*

<sup>1</sup> Piq hì atìq, i wì ban ớng mai òi ta phòq Cana, òi ta gùng Ga-li-lê. I miq Chuaq Jêxu òi ta aih.

<sup>2</sup> Wì pachùh Chuaq Jêxu wa mangai hóc tiaq Haq trùh caq hiniang ban ớng mai. <sup>3</sup> Jò alac nho khoi òìq, miq Chuaq Jêxu doi ca Haq: “Wì pi i ca alac nho.”

<sup>4</sup> Chuaq Jêxu doi: “Ôi miq, hiniq aih ùh xài bìac miq leq, 'nhòq trùh jò òi Au broq bìac.”

<sup>5</sup> Miq Haq doi ca wì hapống ma patìh caq ôq hì aih: “Haq thê pì broq cleq, pì phai iu bàu Haq.”

---

<sup>☆</sup> **1:51** 1:51 BB 28:12.

<sup>6</sup> Jang aih i tadràu toq padrì broq xam hmu, mòiq toq òòiq jah 80 trùh 120 lit diac òòiq 'nheo tì tiaq lè da mangai Yothaiq.

<sup>7</sup> Chuaq Jêxu doi ca wì: “Ùc bình diac rìm padrì beq.” Wì ùc trùh angah haq.

<sup>8</sup> Chuaq Jêxu doi: “Manàiq cô gôch beq, 'ràng ca mangai ma wèq 'bài mangai patìh.”

Wì gôch 'ràng ca haq. <sup>9</sup> Jò mangai ma wèq mangai patìh ôq thù toq 'biaq diac ma khoi wìh wìa alac plì nho, (haq ùh 'nì alac cô khoi i enh leq, mahaq 'bài mangai patìh ma gôch diac aih loq), haq ma wèq mangai patìh creò ca mangai con ống, <sup>10</sup> doi: “Jò wì caq ôq ban ống mai, baxèm adroi, wì padon alac nho jàng. Khoi ca wì ôq bàc, wì am alac nho ùh jàng, mahaq da ìh khoi wèq alac nho yì jàng trùh manàiq.”

<sup>11</sup> Ta Cana gùng Ga-li-lê Chuaq Jêxu broq teo halac baxèm, aih patô bìac 'ngah 'ngai lem lình Haq. Wì mangai hóc tiaq lùì Haq.

<sup>12</sup> Khoi èh, Haq lam ta phôq Ca-bê-na-um ti miq Haq, wì oh Haq wa mangai hóc tiaq Haq. Wì ỏi ta aih toq 'biaq hì.

*Chuaq Jêxu Hnan Wì Mangai Padre Loh Khoi Enh Hnem Cùh Waiq*

*(Mat 21:12-13; Mốc 11:15-17; Luc 19:45-46)*

<sup>13</sup> Hì Lè Lam Cwa mangai Yothaiq trùh. Chuaq Jêxu tócc phôq Jê-ru-sa-lem. <sup>14</sup> Ỏi ta Hnem Cùh Waiq Haq hnoq mangai tech 'bo, trìu, chìm trù, wa mangai halìh 'bac ha'ngui ti aih. <sup>15</sup> Chuaq Jêxu caxenh caxi broq long roi, jêh hnan wì, thê wì òiq òng loh enh gùng ca Hnem Cùh Waiq; trìu, 'bo hadai. Haq ùc cađac 'bac wì ma halìh,

ùc đac ca'bông wì. <sup>16</sup> Haq doi ca wì ma tech chìm trù: “ 'Ràng 'noh enh gùng beq, apaq broq hnem Baq Au loh hnem padro.” <sup>17</sup> Wì mangai hõc tiaq Haq hmàng hlài bàu khoi achìh: “Dài Au loq waq ca hnem Chuaq dìq ca jaq, aih tìah ca ùnh ta manoh broq nan xa ca Au.”<sup>☆</sup>

<sup>18</sup> Wì mangai Yothaiq bòch Haq: “Ìh i ca teo halac leq òiđiq patô ca nhèn hnoq, Ìh i cwìang òiđiq broq bìac cô?”

<sup>19</sup> Chuaq Jêxu padreo bàu doi: “Raliang Hnem Cùh Waiq cô beq, piq hì èh, Au jah broq hlài!”

<sup>20</sup> Wì mangai Yothaiq doi: “Wì broq gêh Hnem Cùh Waiq hadròih cô òiđiq 46 hanam, Ìh broq hlài piq hì 'mòh?” <sup>21</sup> Mahaq Haq anoi hnem hadròih, aih chac Haq. <sup>22</sup> 'Màng aih, atìq ca Haq cachìt rìh hlài, mangai hõc tiaq hmàng hlài bàu aih. Wì lùì bàu Sech Hadròih, wa bàu Chuaq Jêxu khoi doi.

<sup>23</sup> Jò Chuaq Jêxu òi ta Jê-ru-sa-lem, aih jò Lè Lam Cwa, i bacc mangai tiaq Chuaq ma jah 'màng aih wì khoi hnoq teo halac Haq ma broq.

<sup>24</sup> Mahaq Chuaq Jêxu ùh canòm ca wì haq, ma jah 'màng aih Haq loq ca manoh òiđiq ca mangai, <sup>25</sup> ùh nhet ca mangai leq anoi hlài ca Haq con mangai 'màng leq, taiq Chuaq Jêxu khoi loq adroi i bìac cleq enh trom manoh mangai.

### 3

#### *Chuaq Jêxu Capoch Tùang ca Ni-cô-đem*

<sup>1</sup> I mòiq ngai, mangai Pha-ri-si, hiniq haq Ni-cô-đem. Haq mòiq ngai ta 'bài mangai ma wèq

<sup>☆</sup> 2:17 2:17 BCP 69:9.



cwiàng ỏi ta mangai Yothaiq. <sup>2</sup> Damang haq lam trùh ti Chuaq Jêxu, doi 'màng cô: “Nhèn loq ca Ìh Mangai Thài hnài trùh enh Boc Plình, ma jah 'màng aih ùh i ca mangai leq jah broq teo halac ma Ìh khai broq, tàng Boc Plình ùh ỏi ti Haq.”

<sup>3</sup> Chuaq Jêxu padreo hlài bàu, doi ca haq: “Au doi ca ìh bàu joq 'nàng: Tàng con mangai ùh xa-ông hlài, haq ùh jah hnoq Diac Boc Plình.”

<sup>4</sup> Ni-cô-đem bôch Haq: “Mangai khai craq, broq 'màng leq ma jah xa-ông hlài? Ma jah mùt hlài dèh ta cliac miq òiôiq jah xa-ông hlài yàng ma baiq 'mòh?”

<sup>5</sup> Chuaq Jêxu tèo haq: “Au doi ca ìh bàu joq 'nàng: Tàng mangai leq ùh canòm ca diac wa Yiang Hadròih ma xa-ông, ùh i cabô jah mùt Diac Boc Plình. <sup>6</sup> Cleq ma xa-ông tiaq chac hamac, aih loh chac hamac. Cleq ma xa-ông tiaq Yiang Hadròih, aih loh yiang. <sup>7</sup> Apaq hamàih ta manoh Au doi ca ìh, ìh phai xa-ông hlài. <sup>8</sup> Cayeo enh hlôi ta leq, hi hlôi. Ìh tàng atêh, mahaq ùh 'nì cayo trùh enh leq wa hadai ùh 'nì cayo hlài ta leq. Mangai jah Yiang Hadròih xa-ông hadai 'màng aih.”

<sup>9</sup> Ni-cô-đem padreo hlài bàu doi: “Broq 'màng leq ma jah broq bìac cô?”

<sup>10</sup> Chuaq Jêxu tèo: “Ìh broq boc thài hnài wì Is-ra-ên, mahaq ìh ùh 'nì tàng bàu cô 'mòh? <sup>11</sup> Au doi ca ìh bàu joq 'nàng: Nhèn capoch bàu ma nhèn khai loq. Nhèn anoi hlài bìac nhèn khai hnoq, mahaq pì ùh lùì bàu nhèn. <sup>12</sup> Tàng Au doi ca pì bìac ỏi ta crống taneh cô, mahaq pì ùh lùì, ùh dùh dèh Au doi ca pì bìac ỏi ta Diac Plình, pì

jah lùì 'màng leq? <sup>13</sup> Ûh i ca mangai leq khi ta Diac Plinh, enh gùng ca Haq ma khi loh enh Diac Plinh, aih Con Mangai. <sup>14</sup> 'Màng ca Môise khi atua bìh òi ta nòi ðùng hawit 'màng leq, Con Mangai hadai chiùq atua 'màng aih, <sup>15</sup> waq ca mangai leq loq lùì canòm ca Haq i can rìh hloi hloi dalam Haq.

<sup>16</sup> “Tiaq Boc Plinh loq waq ca mangai òi crõng taneh trùh 'mòi Haq khi am ca wì Con Mòi q da Haq, waq ca mangai leq lùì canòm ca Con aih, ùh hnhung, mahaq jah i can rìh hloi hloi. <sup>17</sup> Ma jah 'màng aih, Boc Plinh thê Con Mòi q da Haq trùh ta crõng taneh, ùh xài thê Haq hadrah ta'mòq tòi q, mahaq waq ca wì canòm Haq ðòi q jah dèch. <sup>18</sup> Mangai leq khi lùì canòm Haq ùh 'bìq hadrah ta'mòq tòi q. Mangai leq ùh lùì Haq, mangai aih khi 'bìq hadrah ta'mòq tòi q adroi, tiaq haq ùh chiùq lùì canòm hini q Con Mòi q da Boc Plinh. <sup>19</sup> Biac hadrah ta'mòq tòi q aih 'màng cô: Can 'Nghah khi trùh xreo crõng taneh, mahaq wì loq enh can clam yi hnao ca Can 'Nghah tiaq biac wì broq aih ngang dù. <sup>20</sup> Mangai ma leq broq dù, haq git ca 'ngah, ùh enh trùh ti 'ngah, yùq wì hnoq haq broq dù. <sup>21</sup> Mahaq mangai ma leq broq tiaq bàu joq 'nàng, haq lam trùh ti 'Nghah, waq ca wì jah hnoq biac haq khi broq, aih biac Boc Plinh enh.”

### *Jon 'Baptit Anoi Hlài Hòm*

<sup>22</sup> Khi ca aih, Chuaq Jêxu wa mangai hõc tiaq Haq lam ta gùng Judia. Haq òi ta aih pajùm ca wì ma broq 'baptem. <sup>23</sup> I Jon hadai broq 'baptem òi ta Ênôn haten Salim tiaq i bàc diac òi ta aih.

Bàc ngai adràc dabau trùh chiùq 'baptem. <sup>24</sup> Jò aih Jon 'nhòq 'bìq rùp clèh ta tù. <sup>25</sup> I mòiq ngai, mangai Yothaiq tarahen ca mangai hóc tiaq Jon bìac ranenh lè broq hreo. <sup>26</sup> Wì trùh ti Jon doi: “Thài, jò ìh òi pah tau cròng diac Jôđan, i Chuaq Jêxu òi ti ìh. Ìh khi anoi hlài bìac Haq. Manàiq cô Haq broq 'baptem wa mangai òiq đống lam trùh ti Haq.”

<sup>27</sup> Jon doi: “Ừh i ca mangai leq jah nhàn yóc bìac cleq tàng Boc Plình ùh am ca haq. <sup>28</sup> Pì khi tàng au doi: ‘Au ùh xài Crich, mahaq Boc Plình khi thê au lam adroi ca Haq.’ <sup>29</sup> Mangai leq ban mai, haq aih con ổng. Mangai bua con ổng yòng toq tamàng jò leq tàng bàu con ổng, èh jò aih òiq jaq lem bùi. Taiq 'màng aih, au lem bùi joq 'nàng. <sup>30</sup> Haq phai rai èh rai padèch ha'nhèq. Au phai rai èh rai ha'neq.”

<sup>31</sup> Haq ma khi loh enh 'nhèq trùh ta cô, Haq yi ha'nhèq ca rìm ngai. Mangai leq loh enh crống taneh, haq mangai crống taneh wa capoch bàu crống taneh. Haq ma khi loh enh plình, Haq yi ha'nhèq, yi hnao rìm ngai. <sup>32</sup> Haq anoi hlài bìac Haq ma khi hnoq, bàu Haq ma khi tàng, mahaq ùh i ca mangai lùì bàu Haq. <sup>33</sup> Mahaq tàng mangai leq ma khi lùì bàu Haq, wì jah anoi hlài Boc Plình aih i joq 'nàng. <sup>34</sup> Ma jah 'màng aih, Haq ma Boc Plình thê trùh ta cô capoch bàu Boc Plình taiq Boc Plình am ca Haq Yiang Hadròih bình halùih. <sup>35</sup> Baq loq waq ca Con, èh khi jao am òiq đống rìm bìac ca Con. <sup>36</sup> Mangai ma leq lùì canòm Con Mòiq da Boc Plình i can rìh hloi hloi. Mahaq mangai leq ùh iu tiaq Haq,

ùh jah hnoq can rìh, mahaq can nòih Boc Plình òi hloi ti mangai aih.

## 4

### *Mangai Gu Cadri Sa-ma-ri*

<sup>1</sup> Chuaq Jêxu loq ca wì mangai Pha-ri-si khoi tàng wì anoi, Haq khoi creó tam mangai hóc tiaq wa broq 'baptem mangai yi bàc ca Jon, <sup>2</sup> ('nhac ùh xài cla Chuaq Jêxu broq 'baptem am ca wì, mahaq mangai hóc tiaq da Haq broq.) <sup>3</sup> Jò aih Chuaq Jêxu loh enh gùng Judia, hlài ta Ga-li-lê.

<sup>4</sup> Haq phai lam pajang trong gùng Sa-ma-ri. <sup>5</sup> 'Màng aih, Haq trùh ta phòq 'yoh òi ta gùng Sa-ma-ri, hiniq aih Sikha, haten ca ðùng taneh Jacôp khoi am ca Jôsep con calô haq calah nèh. <sup>6</sup> Ta aih i adràm Jacôp. Taiq Chuaq Jêxu lam ta trong loq tagah lep, Haq ha'ngui haten ca adràm. Manàiq cô 'ne hì.

<sup>7</sup> I mòiq ngai gu cadri Sa-ma-ri trùh gôch diac. Chuaq Jêxu doi ca haq: "Xìn am ca Au ôq diac." <sup>8</sup> Jò aih mangai hóc tiaq Haq khoi mùt ta phòq rôt dahwèq caq.

<sup>9</sup> Gu cadri Sa-ma-ri cô doi ca Haq: "Ìh Mangai Yothaiq, gleq ma jah bòch ca au diac ôq da mangai gu cadri Sa-ma-ri?" Ma jah 'màng aih mangai Yothaiq wa mangai Sa-ma-ri ùh capoch tùang ca dabau.

<sup>10</sup> Chuaq Jêxu padreo hlài bàu doi ca haq: "Tàng ìh loq ca biac ma Boc Plình am dech, wa loq Cabô ma bòch ca ìh diac ôq, ìh jah bòch Haq, èh Haq am ca ìh diac ôq, aih diac rìh."

11 Gu cadrì bòch Haq: “Thài ôi, adràm cô jrùq. Ìh ùh i ca cleq ðòiq gôch. Broq 'màng leq ìh i diac rìh aih? 12 Boc nhèn Jacôp ðòiq hlài adràm cô ca nhèn. Calah nèh cla Haq xôq ôq diac jàng cô, trùh con xau haq, wa ngè aban capò, 'bo haq hadai. Ta 'màng aih, Ìh ma yi càn ca Jacôp 'mòh?”

13 Chuaq Jêxu tèo haq: “Mangai leq ôq diac cô, xôq ôi croh ranǝng. 14 Mahaq cabô ôq diac Au am, ùh jò leq croh ranǝng hòm. Diac Au am jah broq mech diac tamǝc ôi enh dalam con mangai, èh jah rìh hloi hloi.”

15 Gu cadrì doi ca Haq: “Ôi Thài, xìn am ca au diac aih, waq ca au ùh hìaq croh ranǝng, wa ùh hìaq xalep trùh jang cô gôch diac hòm.”

16 Chuaq Jêxu doi ca haq: “Hlài beq, creo ca ǝng ìh, èh chòp lam ta cô.”

17 Gu cadrì tèo: “Au ùh i ca ǝng.”

Chuaq Jêxu doi ca haq: “Ìh doi au ùh i ca ǝng, bàu cô troq, 18 ma jah 'màng aih, ìh khi i padam ngai ǝng, manàiq cô mangai ma 'nang rìh ti ìh, aih ùh xài ǝng ìh. Bìac aih ìh khi doi bàu joq 'nàng.”

19 Gu cadrì doi: “Thài ôi, au hnoq Ìh joq mangai capoch thai Boc Plình. 20 Boc yaq nhèn khi cùh waiq ôi ti wang cô, mahaq pì mangai Yothaiq cùh waiq ôi ti Jê-ru-sa-lem.”

21 Chuaq Jêxu doi ca haq: “Ìh phai lùì bàu Au. Pàng cô ta èh, pì jah cùh waiq Baq ùh xài ôi ti wang cô, ùh xài ta Jê-ru-sa-lem. 22 Pì mangai Sa-ma-ri, pì cùh waiq bìac ma pì ùh 'nì. Nhèn loq bìac nhèn cùh waiq, taiq trong dèch claih

con mangai trùh enh xinoi Yothaiq. <sup>23</sup> Mahaq i jò trùh èh, joq 'nàng jò aih trùh manàiq cô, mangai cùh waiq ma troq, aih wì ma cùh waiq xam yiang, xam manoh joq 'nàng, taiq Baq chaq mangai 'màng cô cùh waiq Haq. <sup>24</sup> Boc Plình, Haq Yiang wa mangai leq cùh waiq Haq, phai yǒc dèh mahua yiang wa manoh joq 'nàng òiq cùh waiq Haq.”

<sup>25</sup> Gu cadrì doi ca Haq: “Au loq Mêsi, aih Crich, phai trùh. Jò Haq trùh, Haq jah hnài bèn rìm trong òiq dǒng.”

<sup>26</sup> Chuaq Jêxu doi ca haq: “Au, Mangai ma 'nang anoi ca ìh, Au raq cla Haq.”

<sup>27</sup> Wop jò aih, mangai hǒc tiaq Chuaq Jêxu lam trùh. Wì hamàih ta manoh hnoq Chuaq Jêxu capoch tùang ca mangai gu cadrì, mahaq ùh i ca mangai leq hùà bǒch Haq: “Ìh nhet cleq?” loq “Gleq ìh ma jah capoch tùang ca mangai gu cadrì cô?”

<sup>28</sup> Gu cadrì cô òiq cabi tùng diac ti aih, lam dech mùt ta plài doi ca wì: <sup>29</sup> “Loh ngan Mangai cô beq! Haq khi anoi dǒng òiq ca au biac ma au khi broq. Mangai cô ma ùh xài Crich 'mòh?”

<sup>30</sup> Wì loh enh plài òiq lam trùh ti Chuaq Jêxu.

<sup>31</sup> Jò wì 'nhòq trùh, mangai hǒc tiaq Haq xìn Haq: “Thài caq beq!”

<sup>32</sup> Haq doi ca wì: “Au i dahwèq caq ma pì ùh 'nì.”

<sup>33</sup> Wì bǒch dabau: “I mangai leq khi am ca Haq dahwèq caq?”

<sup>34</sup> Chuaq Jêxu tèo wì: “Dahwèq caq Au, aih tiaq manoh Baq Au ma thê Au trùh ta cô wa broq òiq

bìac Haq. <sup>35</sup> Ma ùh xài pì doi: 'Õi pôn khê hòm hi trùh jò gat joq ùh'? Mahaq Au doi ca pì ngan cô: Ngoi ngan ðùng 'mau khoi ðùm, padon ca jò gat. <sup>36</sup> Mangai gat, khoi yõc ðèh cùng baha, achauq 'mau genh ahlài ta hnem, aih tiàh ca haq ðèch mangai ðòiq wì jah rìh hloi hloi. 'Màng cô mangai rai adrech wa mangai gat hadai lem bùi pajùm. <sup>37</sup> I bàu joq 'nàng ma doi: 'Mòiq ngai rai adrech, mòiq ngai 'noiç gat.' <sup>38</sup> Au khoi thê pì gat ðùng 'mau ma pì ùh lah rai; wì mangai 'noiç khoi abroq, èh pì jah nhàn yõc bìac ma wì khoi abroq."

<sup>39</sup> Õi ta phòq cô i bàc ngai Sa-ma-ri lùì Chuaq Jêxu taiq gu cadrì cô khoi anoi hlài ca wì bìac Chuaq Jêxu, doi: "Haq khoi capoch troq rìm bìac au ma khoi broq calah nèh." <sup>40</sup> Wì mangai Sa-ma-ri trùh ti Chuaq Jêxu. Wì xìn Haq, waq ca Haq òi ta wì. Haq òi ti aih baiq hì. <sup>41</sup> Jò khoi jah tàng bàu Haq, mangai lùì Haq rai èh, rai bàc.

<sup>42</sup> Wì doi ca gu cadrì: "Manàiq cô nhèn tiaq Haq, ùh xài toq canòm bàu ìh, taiq cla nhèn khoi tàng bàu Haq. Nhèn loq joq 'nàng Chuaq Jêxu, Haq Mangai ðèch da mangai crõng taneh."

*Chuaq Broq Brêh Con Calô Cwan  
(Mat 8:5-13; Luc 7:1-10)*

<sup>43</sup> Chuaq Jêxu òi ta Sa-ma-ri baiq hì, èh Haq lam ta Ga-li-lê, <sup>44</sup> 'nhac cla Haq khoi doi, ùh i ca mangai capoch thai Boc Plình leq ma jah padèch ha'nhèq ðèh gùng haq. <sup>45</sup> Jò khoi trùh crõng Ga-li-lê, mangai Ga-li-lê lem bùi ðìh Haq mùt ti wì, taiq wì khoi hnoq bìac Chuaq Jêxu ma khoi

broq õi ta hì Lè Lam Cwa ta Jê-ru-sa-lem, ma jah 'màng aih wì hadai õi ta aih hì lè aih.

<sup>46</sup> Chuaq Jêxu hlài ta phôq Cana õi ta crông Ga-li-lê, nòi Haq khoi broq diac wìa alac plì nhỏ. I mòiç ngai cwan õi ta Ca-bê-na-um, con calô haq ùh hröc. <sup>47</sup> Jò haq tàng wì doi, Chuaq Jêxu khoi loh enh Judia mùt Ga-li-lê, mangai cwan aih lam trùh ti Chuaq Jêxu, xin Chuaq lam ta Ca-bê-na-um, broq brêh ca con calô haq, ma jah 'màng aih con calô aih ten cachìt.

<sup>48</sup> Chuaq Jêxu doi ca haq: “Tàng pì ùh hnoq teo halac, pì ùh lùì Au!”

<sup>49</sup> Mangai cwan aih padreo hlài bàu doi: “Waiç Thài, xin Thài trùh adroi ca jò con au 'nhòç cachìt!”

<sup>50</sup> Chuaq Jêxu doi ca haq: “Ìh hlài ta hnem beq! Con ìh jah rìh.”

Mangai cwan aih lùì bàu Chuaq Jêxu. Haq hlài. <sup>51</sup> Jò haq õi ti trong, i hapõng lam ãh haq doi: “Con ìh khoi brêh.” <sup>52</sup> Haq bòch wì: “Con au brêh jò leq?” Wì doi: “Mòiç jò 'ne hì, hì nèh, haq brêh ca tôç chac.”

<sup>53</sup> 'Màng cô baq haq khoi loq, aih raq jò Chuaq Jêxu ma doi ca haq: “Con ìh jah rìh.” 'Màng aih, haq wa ãq ãng ca hnem haq lùì Chuaq Jêxu.

<sup>54</sup> Aih yàng baiç Chuaq Jêxu broq trong halac atìç ca Haq loh enh Judia mùt ta Ga-li-lê.

## 5

### *Chuaq Jêxu Broq Brêh Mangai Pen*



<sup>1</sup> Khoi èh, i mòiq hì lè mangai Yothaiq. Chuaq Jêxu lam ta phôq Jê-ru-sa-lem. <sup>2</sup> Òi ta Jê-ru-sa-lem, haten ca 'Mang Ngo Triu, i 'bau diac, bàu Hêbru creò 'Bê-xa-tha, i padam toq pra ta 'mang ngo. <sup>3</sup> Ta cô i bàc mangai ùh hrôc, ùh xau mat, mangai cwê, wa mangai pen, ca'nùng gòm diac lai laq. <sup>4</sup> Wì gòm 'bình plình Chuaq loh broq diac lai laq. Jò khoi broq diac lai laq, mangai ma leq loh ta diac adroi, haq jah broq brêh, ùh kè ùh hrôc 'màng leq. <sup>5</sup> Jang aih i mòiq ngai haq ùh hrôc khoi 38 hanam. <sup>6</sup> Jò Chuaq Jêxu hnoq haq ca'nùng, loq ca haq ùh hrôc khoi dùnh, hi bòch haq: “Ìh enh brêh ùh?”

<sup>7</sup> Haq padreo bàu doi: “Thài ôi, ùh i ca mangai 'noh au ta diac jò diac lai laq. Jò au padon trùh, khoi i mangai trùh adroi ca au.”

<sup>8</sup> Chuaq Jêxu doi ca haq: “Yòng beq! Xùì dradrah cla ìh. Lam beq!” <sup>9</sup> Tajòì 'mòi haq jah broq brêh, xùì dèh dradrah, yòng lam.

Hì aih hì Sabat. <sup>10</sup> Wì mangai Yothaiq doi ca mangai ma neo jah broq brêh: “Hì cô hì Sabat, ìh ùh khòh xùì dradrah.”

<sup>11</sup> Mahaq haq doi ca wì: “Mangai ma broq brêh ca au, Haq doi ca au: ‘Xùì dradrah cla ìh, lam beq!’ ”

<sup>12</sup> Wì bòch haq: “Mangai ma doi ca ìh: Xùì dradrah lam beq, haq cabô?”

<sup>13</sup> Mahaq mangai ma khoi brêh ùh 'nì Haq cabô, taiq Chuaq Jêxu khoi mùt pajùm bàc ngai ta aih.

<sup>14</sup> Khoi èh, Chuaq Jêxu hnoq haq òi ta Hnem Cùh Waiq. Chuaq Jêxu doi ca haq: “Ngan cô,

ìh khai brêh. Pàng cô ta èh, ìh apaq broq tôiq hòmq bìac 'noiç trùh ca ìh yì hnao ca cô.”

<sup>15</sup> Mangai cô lam doi ca wì mangai Yothaiç, aih Chuaq Jêxu ma khai broq brêh ca haq.

<sup>16</sup> Taiç nen aih, wì mangai Yothaiç ti rùp Chuaq Jêxu taiç Haq broq bìac cô ta hì Sabat.

<sup>17</sup> Mahaq Chuaq Jêxu padreo hlài bàu doi: “Baq Au broq bìac enh calah nèh trùh manàiq. Au hadai broq bìac 'màng aih.” <sup>18</sup> Taiç 'màng aih, wì mangai Yothaiç chaq trong jêh cađac Chuaq Jêxu, taiç ùh xài Haq toq broq bìac hì Sabat, mahaq taiç Haq doi, Boc Plình Baq Haq, aih Haq broq am dađeh da-adàng ca Boc Plình.

<sup>19</sup> Taiç 'màng aih, Chuaq Jêxu padreo hlài bàu doi: “Au doi ca pì bàu joç 'nàng: Con Calô Boc Plình ùh canòm ca dađeh broq bìac cleç. Con toq broq bìac ma leç Con hnoq Baq broq. Dìç đống bìac Baq broq, Con hadai broq 'màng aih. <sup>20</sup> Baq loç waç ca Con, patô am ca Con bìac ma Baq 'nàng broq dìç đống rìm bìac. Baq jah patô am ca Con bìac yì càn, waç ca pì hamàih ta manoh.

<sup>21</sup> 'Màng ca Baq broq mangai enh cachit rìh hlài, wa am ca wì can rìh 'màng leç, hadai 'màng aih, Con am can rìh ca mangai leç hi mac ca cla Haq enh waç. <sup>22</sup> Baq ùh hadrah mangai leç, mahaq Baq khai am ca Con cwàng òoiç hadrah wì dìç đống, <sup>23</sup> waç ca wì dìç đống iu Con 'màng ca wì iu Baq. Mangai leç ùh iu Con, aih ùh iu Baq, Haq ma thê Con trùh ta cô.

<sup>24</sup> “Au doi ca pì bàu joç 'nàng: Tàng mangai leç tàng bàu Au, wa lùì Baq Au ma thê Au trùh ta cô, mangai aih jah i can rìh hloi hloi wa ùh hìaq 'bìç hadrah. Haq khai loh enh can cachit

mùt ta can rìh. <sup>25</sup> Au doi ca pì bàu joq 'nàng: Jò ten trùh, manàiq khoi trùh, jò mangai cachit jah tàng bàu Con Calô Boc Plình, wa wì mangai ma tàng bàu aih jah rìh hlài. <sup>26</sup> Ma jah 'màng aih tìah ca Baq i can rìh, 'màng aih Baq khoi am ca Con hadai i can rìh. <sup>27</sup> Baq khoi am ca Con cwàng hadrah taiq cla Con, Haq Con Mangai.

<sup>28</sup> “Apaq hamàih ta manoh bìac cô, ma jah 'màng aih, ten trùh jò dìq dǒng 'bài mangai khoi cachit ǒi ta ralùng tàng bàu Haq, <sup>29</sup> jah loh khoi enh ralùng. Wì mangai khoi broq lem rìh hlài èh jah rìh wa wì ma khoi broq dù, èh wì rìh hlài òiđiq hadrah baxa. <sup>30</sup> Au ùh jah tiaq dèh manoh enh broq bìac cleq. Au hadrah tiaq bìac Au tàng enh Baq. Bìac hadrah Au, aih ta-atoq, ma jah 'màng aih Au ùh tiaq manoh enh Au, mahaq tiaq manoh enh Baq ma thê Au trùh.

<sup>31</sup> “Tàng Au anoi hlài bìac cla Au, pì ùh đàng ca lúi bàu cô. <sup>32</sup> Mahaq i Haq ma 'noiđ anoi hlài bìac Au, Au loq bàu anoi hlài da Haq aih bàu joq 'nàng.

<sup>33</sup> “Pì khoi bòch Jon. Haq khoi anoi hlài bàu joq 'nàng. <sup>34</sup> Au ùh canòm bàu con mangai khoi capoch, mahaq Au doi ca pì bìac cô waq ca pì jah dèch. <sup>35</sup> Jon, haq đen khoi bủh broq 'ngah. Jò pì ǒi ti 'ngah haq, pì bủi lem đò.

<sup>36</sup> “Mahaq Au i bàu anoi hlài càn yi hnao ca bàu anoi hlài da Jon, taiq bìac Baq ma thê Au broq gèh bìac Au broq, aih patô joq 'nàng Baq khoi thê Au trùh. <sup>37</sup> Baq ma thê Au trùh ta cô, Haq khoi anoi hlài bìac Au. Pì ùh lah tàng bàu Haq, hadai ùh lah hnoq Haq. <sup>38</sup> Pì ùh i ca bàu Haq

õi ta manoh pì, ma jah 'màng aih pì ùh lùì Haq ma thê Au trùh ta cô. <sup>39</sup> Pì đốc Sech Hadròih, pì xoh dèh i can rìh hloi hloi òi ti aih, mahaq Sech Hadròih, aih anoi hlài bìac Au. <sup>40</sup> Mahaq pì ùh enh trùh ti Au đòiq jah i can rìh.

<sup>41</sup> “Ừh xài Au nhàn yốc 'ngah 'ngai enh con mangai, <sup>42</sup> mahaq Au loq ca pì ùh i ca manoh loq waq Boc Plình. <sup>43</sup> Au canòm hiniq Baq ma trùh ta pì, mahaq pì ùh đìh yốc Au. Tàng i mangai ma crài canòm dèh hiniq trùh ta pì, pì jah đìh yốc haq. <sup>44</sup> Broq 'màng leq pì ma lùì jò pì enh toq nhàn bàu manè enh dabau yi hnao ca pì ti chaq bàu manè ma toq loh enh Boc Plình hêq?”

<sup>45</sup> “Apaq hèm ta manoh Au jah takian ca pì enh ngia ca Baq, mahaq haq ma takian ca pì, aih Môise, mangai pì canòm. <sup>46</sup> Ma jah 'màng aih, tàng pì khoi lùì Môise, pì hadai jah lùì Au, taiq haq khoi achìh bìac Au. <sup>47</sup> Mahaq tàng pì ùh lùì bàu haq ma khoi achìh, pì jah lùì bàu Au 'màng leq?”

## 6

### *Chuaq Jêxu Broq 'Benh 'Mi Am 5.000 Ngai*

<sup>1</sup> Khoi èh Chuaq Jêxu cwa pah tau diac raxìq Ga-li-lê, aih diac raxìq Ti-bê-ri-at. <sup>2</sup> Mòiq lù bàc ngai tiaq Haq, taiq wì khoi hnoq teo halac Chuaq Jêxu ma broq òi ti chac wì mangai ùh hróc. <sup>3</sup> Chuaq Jêxu tồc ta wang ha'ngui pajùm ti mangai hỏc tiaq Haq. <sup>4</sup> Jò hì Lè Lam Cwa ten trùh.

<sup>5</sup> Chuaq Jêxu ngan hnoq wì mangai bàc hrìn lam trùh ti Haq. Haq doi ca Philip: “Bèn lam rỏt

'benh ỏi nòi leq ðòiq am ca wì caq?" <sup>6</sup> Haq bòch bàu aih ðòiq Haq thù Philip, ma jah 'màng aih Haq khoi loq adroi Haq phai broq cleq.

<sup>7</sup> Philip tèo: "Rõt 200 ðùng ðê-na-ri 'bac 'benh mì xôq ùh tàu am ca wì mòi q ngai toq 'biaq."

<sup>8</sup> I mòi q ngai, mangai hõc tiaq Chuaq Jêxu, aih Anrê, oh Simôn Pêtrô, doi ca Haq: <sup>9</sup> "I mòi q ngai con calô 'yoh ỏi ta cô, haq i padam toq 'benh 'mau mat, baiq pliang ca, mahaq broq 'màng leq mangai bàc 'màng cô?"

<sup>10</sup> Chuaq Jêxu doi: "Thê wì haq ha'ngui." Ta aih i bàc nhat. Wì haq ha'ngui, rên toq gu calô i 5.000 ngai. <sup>11</sup> Chuaq Jêxu yõc 'benh mì cô, manè pôi Boc Plinh, khoi èh, Haq axong ca mangai ha'ngui. Haq hadai axong ca ca wì hi mac ca wì enh waq.

<sup>12</sup> Jò wì khoi panàc, Chuaq Jêxu doi ca mangai hõc tiaq Haq: "Ti tõi hlaì ðiq bàc ha'nech 'benh khoi padah, ðòiq ùh hiaq cađac hnhung." <sup>13</sup> Wì tõi hlaì 'bài ha'nech da padam toq 'benh 'mau mat atiq ca wì ma khoi caq, jah 10 baiq rojo.

<sup>14</sup> Jò wì hnoq trong halac ma Haq khoi broq, wì doi: "Mangai cô joq 'nàng Mangai Capoch Thai Boc Plinh phai trùh ta crõng taneh." <sup>15</sup> Jò Chuaq Jêxu loq wì enh rùp panan Haq broq bùa, Haq tõi ta wang ỏi crài mòi q Ngai.

### *Chuaq Jêxu Cadiang lam ti Riang Diac Raxiq*

<sup>16</sup> Khoi xèq, wì mangai hõc tiaq Haq loh ta diac raxiq. <sup>17</sup> Wì tõi ta bong, waq ca cwa diac raxiq ðòiq trùh Ca-bê-na-um. Manàiq khoi clam. Chuaq Jêxu 'nhòq trùh ti wì. <sup>18</sup> Cayeo hlôi dèh broq ca diac lai laq càn. <sup>19</sup> Jò wì khoi chùng bong jah padam loq tadràu khê xôq, wì hnoq Chuaq

Jêxu lam ti riang diac raxìq, ten trùh ti wì. Wì yùq crè. <sup>20</sup> Mahaq Chuaq Jêxu doi ca wì: “Au cô, apaq yùq.” <sup>21</sup> Jò aih, wì thê Haq tồc ta bong. Tajòì 'mòi bong khi trùh ti 'bò diac ma wì waq ca trùh.

### *'Benh Can Rìh*

<sup>22</sup> Hì atìq, bàc ngai yòng pah tau diac raxìq. Wì khi hnoq òi jang aih i mòiq toq bong. Mangai hỏc tiaq da Chuaq Jêxu tồc ta bong, mahaq Chuaq Jêxu ùh tồc ta bong dèh ti 'bài mangai hỏc tiaq. <sup>23</sup> Hadai i bàc bong ma 'noi q loh enh Ti-bê-ri-at trùh haten ca nòi ma Chuaq Jêxu am ca wì caq atìq ca Haq manè pôi. <sup>24</sup> Jò wì khi loq Chuaq Jêxu wa mangai hỏc tiaq Haq ùh òi jang aih hòm, wì hadai tồc ta bong trùh ti Ca-bê-na-um, chaq Chuaq Jêxu.

<sup>25</sup> Jò wì hnoq Haq òi pah tau diac raxìq, wì bòch Haq: “Thài, Ìh trùh ta cô jò leq?”

<sup>26</sup> Chuaq Jêxu doi: “Au doi ca pì bàu joq 'nàng, pì chaq Au, ùh xài taiq pì khi hnoq teo halac Au broq, mahaq taiq pì khi jah caq 'benh panàc.

<sup>27</sup> Apa q àu ran hrìn ca dahwèq caq loq hnhung, mahaq phai ti chaq dahwèq ma jah i can rìh hloi hloi Au jah am ca pì, tiaq Boc Plình Baq Au enh, taiq Haq khi ràih Au broq 'màng cô.”

<sup>28</sup> Wì doi ca Haq: “Đòiq nhèn jah broq biac Boc Plình, nhèn phai broq cleq?”

<sup>29</sup> Chuaq Jêxu tèo wì: “Biac broq da Boc Plình, aih lùì Haq ma Boc Plình thê trùh ta cô.”

<sup>30</sup> Ma jah 'màng aih wì doi ca Haq: “Tàng 'màng aih, Ìh broq teo halac ma leq waq ca bèn hnoq đòiq lùì Ìh. Ìh padon broq biac cleq? <sup>31</sup> Boc

yaq nhèn khoi caq mana òi ta nòi ðùng braih càn, 'màng ca Sech Hadròih khoi achìh: 'Haq am ca wì caq 'benh ma loh enh plình.'✧”

<sup>32</sup> Chuaq Jêxu tèo wì: “Jòq 'nàng, jòq 'nàng, Au doi ca pì: Môise 'nhòq lah am ca pì 'benh enh plình, mahaq Baq Au ma am ca pì 'benh jòq 'nàng, aih 'benh enh plình. <sup>33</sup> Ma jah 'màng aih 'benh Boc Plình, aih 'benh enh plình loh ðoìq am can rìh ca crõng taneh.”

<sup>34</sup> Wì doi: “Chuaq ôi, am ca nhèn 'benh aih hloi hloi.”

<sup>35</sup> Chuaq Jêxu tèo: “Au cô 'benh ma broq rìh. Mangai leq trùh ti Au, haq ùh pangot hòm wa mangai leq lùì Au, haq ùh croh ranõng hòm.

<sup>36</sup> Mahaq Au khoi doi ca pì: Pì khoi hnoq Au, mahaq xôq ùh lùì Au. <sup>37</sup> 'Bàì mangai leq Baq ma am ca Au èh, wì trùh ti Au wa mangai leq trùh ti Au, Au jòq 'nàng ùh cađac haq. <sup>38</sup> Ma jah 'màng aih, Au loh enh plình, ùh xài waq ca tiaq dèh manoh, mahaq waq ca tiaq manoh Baq ma thê Au trùh. <sup>39</sup> Manoh enh da Baq ma thê Au trùh, aih mangai leq Haq ma khoi am ca Au, Au ùh cađac hnhung, mahaq hì ma atiq lùch Au jah broq wì ðìq ðõng rìh hlài. <sup>40</sup> Taiq manoh Baq Au 'màng cô: Mangai leq ngan hnoq Con Haq wa lùì Con aih, mangai cô i can rìh hloi hloi; hì ma atiq lùch Au broq haq rìh hlài.”

<sup>41</sup> Wì mangai Yothaiq mamùc ca Haq taiq Haq khoi doi: “Au 'benh khoi loh enh plình.” <sup>42</sup> Wì doi: “Mangai cô, Haq Chuaq Jêxu, con Jôsep. Bèn loq ca miq wa baq Haq. Manàiq cô Haq

✧ **6:31** 6:31 LEA 16:4; Nêh 9:15; BCP 78:24,25.

hùa doi: 'Au khoi loh enh plình. Bìac aih 'màng leq?' "

<sup>43</sup> Chuaq Jêxu doi: "Pì apaq mamùc mamac ca dabau. <sup>44</sup> Ûh lah i mòiq ngai leq trùh ti Au tàng ùh i ca Baq 'ràng trùh. Mangai leq trùh ti Au, Au jah broq wì haq rìh hlài diq dõng hì ma atìq lùch. <sup>45</sup> Bàu mangai capoch thai Boc Plình khoi achìh ta Sech Hadròih: 'Wì diq dõng jah tàng bàu Boc Plình nhài.' ☆ Cabô tamàng bàu Baq wa hõc tiaq Haq, rìm ngai aih trùh ti Au. <sup>46</sup> Ûh i ca mangai leq khoi hnoq Baq enh gùng Au ma khoi trùh enh Boc Plình, Au khoi hnoq Baq. <sup>47</sup> Au doi ca pì bàu joq 'nàng: Mangai leq ma lùì Au, i can rìh hloi hloi. <sup>48</sup> Au cô raq 'benh can rìh. <sup>49</sup> Boc yaq pì òi ta nòi ðùng hawit, wì khoi caq mana, mahaq wì khoi cachit. <sup>50</sup> Cô 'benh loh enh plình. Mangai leq caq 'benh cô, haq ùh cachit. <sup>51</sup> 'Benh ma broq ca con mangai rìh, aih raq 'benh ma khoi loh enh plình, aih Au cô. Mangai leq caq 'benh cô jah rìh hloi hloi. 'Benh ma Au am, aih 'benh waq ca pì mangai crõng taneh jah rìh, aih chac hamac Au."

<sup>52</sup> Wì mangai Yothaiq tarahen ca dabau, doi: " 'Màng leq Mangai cô jah am ca bèn caq chac hamac Haq?"

<sup>53</sup> Chuaq Jêxu doi ca wì: "Au doi ca pì bàu joq 'nàng, tàng pì ùh caq chac hamac Au, wa tàng pì ùh ôq mahem Au, pì ùh i can rìh òi ta pì. <sup>54</sup> Mangai leq caq chac hamac Au wa ôq mahem Au, haq i can rìh hloi hloi, hì ma atìq lùch Au broq haq rìh hlài. <sup>55</sup> Ma jah 'màng aih, chac

---

☆ 6:45 6:45 Êsai 54:13.



hamac Au dahwèq caq joq 'nàng, wa mahem Au dahwèq ôq joq 'nàng. <sup>56</sup> Mangai leq caq chac hamac Au wa ôq mahem Au, haq ôi enh dalam ca Au, Au ôi enh dalam ca haq. <sup>57</sup> 'Màng ca Baq ma rih hloi hloi thê Au trùh ta cô, nhò Haq Au hadai rih, 'màng aih mangai leq caq Au taiq Au rih, haq hadai rih. <sup>58</sup> Cô 'benh khi loh enh plinh. 'Benh cô ùh xài tiah ca 'benh Mana troi boc yaq pì khi caq, khi èh xôq cachit. Cabô caq 'benh cô jah rih hloi hloi." <sup>59</sup> Chuaq Jêxu hnài bàu cô ôi ta hnem tagop Ca-bê-na-um.

<sup>60</sup> Bàc ngai hóc tiaq Haq tàng bàu cô, wì doi: "Bàu cô xa ha'bo ca tàng! Cabô ma nui loq tàng?"

<sup>61</sup> Chuaq Jêxu loq ca manoh wì mamùc. Haq doi ca wì: "Bàu aih broq ca manoh pì catôih cro ajoq? <sup>62</sup> Tàng pì jah hnoq Con Mangai hlài ta plinh nòi Haq ma ôi adroi nèh, pì hèm 'màng leq? <sup>63</sup> Cla Yiang Hadròih men broq am can rih. Chac hamac ùh i lòiq cacleq. Bàu ma Au khi doi ca pì, aih bàu da Yiang Hadròih wa can rih. <sup>64</sup> 'Nhac 'màng aih, ôi ta'ne pì xôq i mangai ùh lùì Au." Taiq 'màng aih enh jò baxèm Chuaq Jêxu khi loq cabô ùh lùì Haq wa cabô blòq Haq. <sup>65</sup> Chuaq Jêxu ôi doi ca wì: "Ma jah 'màng aih troi Au khi doi ca pì, ùh i mangai leq jah trùh ti Au tàng Baq Au ùh am."

### *Pêtrô Pa'noh Chuaq Jêxu*

<sup>66</sup> Pàng jò aih i bàc ngai ma tiaq Haq ùh lam ti Haq hòm.

<sup>67</sup> Chuaq Jêxu bòch wì 12 ngai, mangai hóc tiaq Haq: "Pì hadai ùh enh lam tiaq Au hòm 'mòh?"

68 Simôn Pêtrô tèo: “Waiq Chuaq, nhèn jah lam tiaq ðeh cabô? Ìh i bàu can rìh hloi hloi. 69 Nhèn lùì Ìh, hi loq joq 'nàng Ìh raq Con Hadròih Boc Plình.”

70 Chuaq Jêxu padreo hlài bàu doi ca wì: “Au khoi ràih pì 12 ngai, joq ùh? Mahaq òi ta pì i mòiq ngai, haq aih can kiac macwì!” 71 Chuaq Jêxu anoi bàu cô aih patô Juda, con calô Simôn Ich-ca-ri-ôt, ma jah 'màng aih haq mòiq òi ta 12 ngai, mangai hõc tiaq ma padon blòq Chuaq.

## 7

### *Wì Oh Chuaq Jêxu Ùh Lùì Haq*

1 Atiq ca aih, Chuaq Jêxu lam jàp gùng Ga-li-lê. Haq ùh waq trùh ta gùng Judia hòm taiq wì mangai Yothaiq chaq trong jêh cađac Haq. 2 Jò aih hi lè mangai Yothaiq ten trùh. Cô lè Hapom Broq Đò da wì haq. 3 Wì oh calô Chuaq Jêxu doi ca Haq: “Ìh phai loh enh cô lam Judia beq, waq ca wì mangai hõc tiaq Ìh hadai jah hnoq Ìh broq bìac. 4 Ma jah 'màng aih, ùh i ca mangai leq broq bìac ta nòi hlèp jò cla haq enh waq ca bàc ngai loq ca dađeh. Taiq Ìh khoi broq jah bìac cô, èh Ìh khòh pa'noh dađeh ca phù cròng loq beq!” 5 Ma jah 'màng aih wì oh Haq hadai ùh lùì Haq.

6 Chuaq Jêxu padreo hlài bàu, doi: “'Nhòq trùh jò da Au lam, mahaq pì èh ùh kè jò leq, pì ji jah lam. 7 Wì mangai crõng taneh ùh jah git ca pì, mahaq wì git ca Au taiq Au anoi hlài wì broq bìac dù. 8 Pì lam caq lè beq! Au 'nhòq lam, ma jah

'màng aih 'nhòq trùh jò da Au." <sup>9</sup> Khoi ca Haq anoi bàu cô, Haq ỏi hlài ta Ga-li-lê.

<sup>10</sup> Mahaq jò wì oh Haq khoi lam caq lè, Chuaq Jêxu hadai lam, mahaq Haq lam hlèp taiq Haq ùh enh ca cabô loq. <sup>11</sup> Mangai Yothaiq chaq Haq ta hì broq lè. Wì bòch dabau: "Haq ỏi ta leq?"

<sup>12</sup> Wì bàc ngai ta bahech ca dabau bàc bìac Chuaq Jêxu. I mangai doi: "Haq Mangai lem."

I mangai ma 'noi q doi: "Ùh xài, Haq padô 'nùt con jàn." <sup>13</sup> Mahaq ùh i ca mangai capoch bàu ma ro taiq wì yùq ca mangai Yothaiq.

### *Chuaq Jêxu Hnài ta Hnem Cùh Waiq*

<sup>14</sup> Trùh 'ne jò lè, Chuaq Jêxu tồc ta Hnem Cùh Waiq, hnài wì. <sup>15</sup> Wì mangai Yothaiq hamàih. Wì bòch dabau: "Mangai cô ùh i lam hỏc, 'màng leq Haq ma rabiaq ca Sech Hadròih?"

<sup>16</sup> Chuaq Jêxu tèo wì: "Bàu Au ma hnài pì, ùh xài bàu Au, mahaq bàu Haq ma thê Au trùh ta cô. <sup>17</sup> Mangai leq i manoh broq tiaq manoh enh da Boc Plình, haq jah loq bìac Au ma hnài, aih loh enh Boc Plình, loq Au tiaq dèh manoh. <sup>18</sup> Mangai ma tiaq dèh manoh capoch, haq chaq trong òoiq mangai manè haq, mahaq Mangai ma chaq trong 'ngah 'ngai da Boc Plình ma khoi thê Haq trùh ta cô, aih Mangai broq bìac joq 'nàng, Haq ùh amòng. <sup>19</sup> Môise ma ùh xài khoi am ca pì Ranenh 'mòh? Mahaq ùh i ca mangai ỏi ta pì ma tiaq Ranenh cô! Gleq pì chaq trong jêh cađac Au?"

<sup>20</sup> Wì mangai pajùm padreo hlài bàu, doi: "Ìh i can kiac ỏi ti chac Ìh. Cabô chaq trong jêh cađac Ìh?"

21 Chuaq Jêxu doi ca wì: “Au khoi broq mòiq biac, pì rìm ngai hamàih ta manoh. 22 Môise khoi am ca pì lè cat akia, ùh xài lè cô baxèm enh Môise, mahaq lè cô baxèm enh boc yaq pi calah nèh, èh pì broq lè cat akia ca mangai trom hì Sabat. 23 Tàng hì Sabat jah broq lè cat akia wa xôq ùh hiaq broq ùh troq ca Ranenh Môise, gleq pì ma loh nòih ca Au taiq hì Sabat Au khoi broq brêh òiq ca chac hamac mòiq ngai? 24 Apa q ngan toq biac enh gùng òòi q hadrah, mahaq phai tiaq trong ta-atoq òòi q hadrah.”

25 Jò aih i wì mangai ta phòq Jê-ru-sa-lem doi: “Cô i joq Mangai wì ma chaq trong jêh cađac Haq? 26 Ngan cô! Haq capoch enh ngia ca wì, ùh i cabô leq doi cleq ca Haq. Dua mangai wèq cwàng khoi loq ca Haq joq 'nàng Crich, joq ùh? 27 Bèn loq ca Mangai cô Haq loh enh leq, mahaq jò Crich trùh ta cô, ùh i ca cabô loq ca Haq trùh enh leq.”

28 Jò Chuaq Jêxu 'nang hnài wì trom Hnem Cùh Waiq, Haq doi bàu dèh: “Jòq, pì canao ca Au. Pì loq ca Au loh enh nòi leq! Au khoi trùh ta cô ùh xài taiq cla Au trùh ðeh, mahaq Haq ma Jòq 'Nàng khoi thê Au trùh, pì ùh canao loq ca Haq. 29 Au loq ca Haq, taiq Au loh enh Haq. Cla Haq khoi thê Au trùh ta cô.”

30 Màng aih wì chaq trong rùp cật Haq, mahaq ùh i ca mangai leq bèq Haq taiq jò da Haq 'nhòq trùh. 31 Ta wì cô i bàc ngai lùì Haq, wì doi: “Jò Crich trùh ta cô, Haq jah broq teo halac yi hnao ca Mangai cô khoi broq ùh?”

*Mangai Yothaiq Hatinh Rùp Chuaq*

<sup>32</sup> Wì mangai Pha-ri-si tamàng wì bahech ca dabau biac Chuaq Jêxu 'màng aih. Wì pajàu càn wa wì Pha-ri-si thê mangai rap lam rùp Haq.

<sup>33</sup> Chuaq Jêxu doi ca wì: “Au òi ta pì toq 'biaq hòm, khoi èh, Au hlài ta Haq ma thê Au trùh ta cô. <sup>34</sup> 'Nhac ca pì chaq Au, mahaq chaq ùh hnoq, ma jah 'màng aih pì ùh jah lam trùh nòi Au òi.”

<sup>35</sup> Wì mangai Yothaiq capoch tùang ca dabau, doi: “Mangai cô jah lam ta leq bèn chaq Haq ùh hnoq? Loq Haq lam ti wì mangai Yothaiq òi ta mangai Hilap, hnài wì mangai Hilap 'mòh?

<sup>36</sup> Bàu Haq i hiniq cleq ma Haq doi: Pì jah chaq Au, mahaq chaq ùh hnoq, ma jah 'màng aih, pì ùh jah lam trùh nòi Au?”

<sup>37</sup> Trùh hì lùch lè Broq Hapom Đò, aih hì ma yi càn ta dìq ca hì broq lè aih, Chuaq Jêxu yòng enh ngĩa ca wì creò bàu dêh, doi: “Mangai leq croh ranõng, trùh ti Au beq, ôq beq! <sup>38</sup> Mangai leq lùì Au, tiaq bàu troi Sech Hadròih khoi achìh, i cròng diac broq rìh halình loh enh manoh Haq.”

<sup>39</sup> Haq anoi 'màng aih òi patô ca wì loq ca Yiang Hadròih, òi mangai leq lùì Haq èh jah nhàn yõc, ma jah 'màng aih Yiang Hadròih 'nhòq trùh, taiq Chuaq Jêxu 'nhòq jah 'ngah 'ngai lem lìn.

<sup>40</sup> Jò wì tàng bàu cô, i mangai doi: “Mangai cô joq 'nàng Mangai capoch thai Boc Pình am ca bèn.”

<sup>41</sup> Wì ma 'noi q doi: “Cô Crich.”

I mangai 'noi q hòm doi: “Crich cleq ma loh enh gùng Ga-li-lê? <sup>42</sup> Sech Hadròih òi Crich, Haq xinoi Đawit, loh enh 'Bêl-lê-hem, phòq Đawit 'mòh?” <sup>43</sup> 'Màng aih wì talah ca dabau taiq biac

Chuaq Jêxu. <sup>44</sup> I 'nah ngai enh rùp Haq, mahaq ùh i ca mangai leq bèq tì ti chac Haq.

<sup>45</sup> Jò 'bài mangai rap hlài, wì pajàu càn wa mangai Pha-ri-si bòch wì haq: “Gleq pì ma ùh 'ràng Haq ta cô?”

<sup>46</sup> Wì mangai rap tèo hlài bàu, doi: “Ùh lah tàng mangai leq capoch bàu 'màng ca Mangai cô.”

<sup>47</sup> Wì Pha-ri-si bòch: “Cla pì khoi 'biq Haq padô 'nùt pì 'mòh? <sup>48</sup> Ma i ca mangai leq òi ta wì mangai craq, loq mangai Pha-ri-si khoi lùì Haq òh? <sup>49</sup> Mahaq con jàn cô ùh 'nì ca Ranenh, đang ca hanip wì haq!”

<sup>50</sup> Òi ta 'bài mangai Pha-ri-si aih, i mòiq ngai, hiniq haq Ni-cô-đem. Adroi ca aih, jò damang, haq khoi lam hmàih ca Chuaq Jêxu. Haq bòch wì: <sup>51</sup> “Ranenh bèn ma khòh ta'mòq tôiq ca mangai leq ta jò 'nhòq tàng bàu cla Haq doi biac Haq khoi broq 'mòh?”

<sup>52</sup> Wì padreo hlài bàu doi: “Ìh hadai mangai Ga-li-lê 'mòh? Ìh chaq ta Sech Hadròih jah hnoq, ùh i ca mangai capoch thai Boc Plình leq jah loh enh Ga-li-lê!”

<sup>53</sup> Rìm ngai hlài dèh ta hnem.

## 8

### *Mangai Gu Cadri Broq Tôiq*

<sup>1</sup> Jò aih Chuaq Jêxu tọc ta wang Ôliu. <sup>2</sup> Xròih xroq Chuaq Jêxu hlài ta Hnem Cùh Waiq. Dìq ca jàn trùh ti Haq, hi khoi Haq ha'ngui hnài wì. <sup>3</sup> Jò aih, wì thài ranenh wa mangai Pha-ri-si 'ràng trùh mòiq ngai gu cadri ma wì khoi rùp jò haq

tango. Wì thê haq yòng ta'ne wì. <sup>4</sup> Wì doi ca Chuaq Jêxu: “Thài ôi, gu cadrì cô khoi jah rùp jò haq 'nang tango. <sup>5</sup> Tàng broq tiaq Ranenh da Môise thê, khòh tèm hmu jêh cađac mangai gu cadrì 'màng cô, mahaq ìh doi 'màng leq?” <sup>6</sup> Wì bòch Haq 'màng cô ðòiq bahlac Haq, chaq trong takian ca Haq.

Mahaq Chuaq Jêxu cùp gàu yỏc hadrang tì achìh ta taneh. <sup>7</sup> Wì bòch yôt Haq, 'màng aih Haq yòng doi ca wì: “I mangai leq ỏi ta pì ma ùh lah broq tôiq, ðòiq haq tỏch hmu tèm gu cadrì cô adroi beq.” <sup>8</sup> Khoi ca doi bàu cô, Chuaq Jêxu cùp gàu, yỏc hadrang tì achìh ta taneh mòi q yàng hòm.

<sup>9</sup> Wì ma tàng bàu cô, wì tiaq dabau loh lam tang ngai mòi q, mangai cra q loh lam adroi. Chuaq Jêxu ỏi hlài mòi q ngai, wa gu cadrì aih xôq ỏi yòng tì aih. <sup>10</sup> Chuaq Jêxu yòng bòch mangai cadrì aih: “Wì ma kian ìh ta leq? ùh i mangai leq ta'mòq tôiq ca ìh 'mòh?”

<sup>11</sup> Gu cadrì aih tèo: “Wai q Chuaq, ùh i.”

Chuaq Jêxu doi: “Au hadai ùh ta'mòq tôiq ca ìh. Lam beq, apa q broq tôiq hòm?”

### *Chuaq Jêxu Broq 'Nghah Crống Taneh*

<sup>12</sup> Mòi q yàng hòm Chuaq Jêxu doi ca wì: “Au Can 'Nghah crống taneh. Mangai leq tiaq Au, èh ùh lam ta clam hòm, mahaq i Can 'Nghah da can rìh.”

<sup>13</sup> Mangai Pha-ri-si doi: “Ìh anoi hlài bìac cla ìh. Bàu anoi hlài cô ùh đàng ca lùì.”

<sup>14</sup> Chuaq Jêxu tèo hlài bàu wì: “'Nhac ca Au anoi hlài bìac cla Au, bàu Au xôq đàng ca lùì,

ma jah 'màng aih, Au khoi loq Au trùh enh leq wa hlài ta leq, mahaq pì ùh 'nì Au trùh enh leq, hadai ùh 'nì Au lam ta leq. <sup>15</sup> Pì hadrah tiaq chac hamac. Au ùh hadrah cabô. <sup>16</sup> Mahaq, tàng Au hadrah èh, bìac hadrah aih ta-atoq, ma jah 'màng aih, ùh xài Au òi mòiq Ngai hadrah, mahaq Au hadrah pajùm ti Baq ma khoi thê Au trùh. <sup>17</sup> Khoi achìh ta sech ranenh pì: Tàng i baiq ngai anoi hlài mòiq bàu, aih đàng ca lùì. <sup>18</sup> Au mòiq Ngai anoi hlài bìac cla Au. Baq Au, Haq ma thê Au trùh ta cô, hadai anoi hlài am ca Au.”

<sup>19</sup> Wì bòch Haq: “Baq ìh òi ta leq?”

Chuaq Jêxu tèo wì: “Pì ùh loq ca Au, hadai ùh loq ca Baq Au. Tàng pì loq ca Au, èh pì hadai khoi loq ca Baq Au.” <sup>20</sup> Chuaq Jêxu doi bàu cô jò òi ta Hnem Cùh Waiq, haten ca thùng tah 'bac. ùh i cabô hnhu tì rùp Haq, ma jah 'màng aih jò da Haq 'nhòq trùh.

<sup>21</sup> Haq anoi hòm ca wì: “Au loh lam, èh pì jah chaq Au, mahaq pì jah cachìt dèh ta tôiq lôì cla pì. Pì ùh jah trùh nòi Au ma padon lam.”

<sup>22</sup> Wì mangai Yothaiq anoi ca dabau: “Haq khoi doi: Pì ùh jah trùh nòi Au ma lam, 'màng aih Haq jêh cađac dađeh 'mòh?”

<sup>23</sup> Haq anoi paro ca wì: “Pì loh enh 'neq. Au loh enh 'nhèq. Pì loh enh crống taneh cô, mahaq Au ùh loh enh crống taneh cô. <sup>24</sup> 'Màng aih, Au doi ca pì: Pì jah cachìt dèh ta tôiq lôì cla tàng pì ùh lùì Au cô Chuaq Crich, èh pì ep cachìt dèh ta tôiq lôì cla pì.”

<sup>25</sup> Wì bòch Haq: “Ìh cô cabô?”



Chuaq Jêxu tèo: “Au khoi doi ca pì Au cabô enh jò baxèm raq. <sup>26</sup> Au i bàc bìac anoi wa hadrah bìac da pì, mahaq Boc Plinh ma thê Au trùh ta cô, Haq toq doi bàu joq 'nàng. Au loq anoi hlài ca wì òi ta crõng taneh bìac aih ma Au khoi tàng enh Haq.”

<sup>27</sup> Wì ùh 'nì tàng bàu Chuaq Jêxu anoi ca wì haq bìac Chuaq Baq. <sup>28</sup> 'Màng aih, Chuaq Jêxu doi: “Jò leq pì dèch atua Con Mangai, jò aih pì jah loq cla Au cô Chuaq Crich. Au ùh tiaq dèh manoh broq bìac cleq, mahaq Au anoi hlài bìac cleq Baq Au ma khoi hnài Au. <sup>29</sup> Haq ma thê Au trùh, jò leq xôq òi ti Au. Haq ùh jò leq cađac Au òi mòiq Ngai taiq Au lem ca manoh Haq rìm trong.” <sup>30</sup> Jò Chuaq Jêxu anoi ca wì bàu cô, i bàc ngai lùì Haq.

<sup>31</sup> Manàiq cô, Haq hadai doi ca wì mangai Yothaiq ma khoi lùì Haq: “Tàng pì cajap manoh tiaq bàu Au, pì men broq mangai hóc tiaq joq 'nàng da Au. <sup>32</sup> Pì jah loq 'nì ca bàu joq 'nàng, wa bàu joq 'nàng cô jah lèh ca'naih pì.”

<sup>33</sup> Wì padreo hlài bàu doi: “Nhèn broq con caiq xinoi da Ap-ra-ham, ùh lah broq hapõng cabô. Gleq ìh ma jah doi: Jah lèh ca'naih pì?”

<sup>34</sup> Chuaq Jêxu doi: “Au doi ca pì bàu joq 'nàng: Mangai ma leq loq broq tôiq, haq broq hapõng ca tôiq lòi. <sup>35</sup> 'Màng cô, hapõng ùh jah òi hloi ta hnem, mahaq con calô cla ma jah òi hloi ta hnem aih. <sup>36</sup> 'Màng aih, tàng Con Boc Plinh ca'naih pì, èh pì jah ùh tawac ùh pakènh joq 'nàng. <sup>37</sup> Joq, Au loq ro pì xinoi da Ap-ra-ham, mahaq pì chaq trong jèh cađac Au, taiq bàu Au ùh jah mùt ta

manoh pì. <sup>38</sup> Au anoi hlài biac Au ma khoi hnoq òi ti Baq Au. Pì broq biac ma pì khoi tàng òi ti baq pì.”

<sup>39</sup> Wì padreo hlài bàu doi: “Baq nhèn aih Ap-ra-ham.”

Chuaq Jêxu doi: “Tàng pì broq con caiq Ap-ra-ham joq 'nàng, 'màng aih pì phai broq tiaq trong Ap-ra-ham ma broq. <sup>40</sup> Mahaq manàiq cô pì chaq trong jêh cađac Au, Mangai ma khoi anoi ca pì biac joq 'nàng Au ma tàng enh Boc Plình. Ap-ra-ham 'nhòq lah broq biac 'màng aih! <sup>41</sup> Pì hadai broq biac dù 'màng ca baq pì.”

Wì doi: “Nhèn ùh xài con tango anang. Nhèn i mòiq ngai Baq, aih Boc Plình.”

<sup>42</sup> Chuaq Jêxu doi: “Tàng Boc Plình Baq pì, pì jah loq waq ca Au, ma jah 'màng aih taiq Au loh enh Boc Plình. ùh xài Au tiaq dèh manoh ma trùh ta cô, mahaq cla Haq thê Au trùh ta cô. <sup>43</sup> Gleq pì ma ùh 'nì tàng bàu Au? Aih taiq pì ùh nui 'nì loq tàng bàu Au! <sup>44</sup> Pì loh enh baq pì. Haq can kiac Satan wa manoh pì ham tiaq manoh haq. Enh calah baxèm haq jêh cađac mangai taiq haq ùh chiùq yòng pah biac joq 'nàng taiq ùh i ca biac joq 'nàng òi ti haq. Jò haq capoch amòng, aih haq capoch tiaq manoh haq, ma jah 'màng aih haq xem capoch amòng taiq haq broq baq da bàu capoch amòng. <sup>45</sup> Taiq Au capoch bàu joq 'nàng ma pì ùh chiùq lùì Au. <sup>46</sup> Òi ta pì i mangai leq rùp Au ta'mòq tôiq jah? Tàng Au capoch biac joq 'nàng, gleq pì xòq ùh lùì Au? <sup>47</sup> Mangai ma leq broq mangai da Boc Plình, haq

tamàng tiaq bàu Boc Plình. Pì ùh tamàng taiq pì ùh broq mangai da Boc Plình.”

<sup>48</sup> Wì mangai Yothaiq doi: “Nhèn doi, Ìh Mangai Sa-ma-ri ma i can kiac 'nang òi ti Ìh, ma ùh joq?”

<sup>49</sup> Chuaq Jêxu doi: “Au ùh i ca can kiac leq, mahaq Au padèch dèh Baq Au mahaq pì jù lê Au. <sup>50</sup> Cla Au ùh chaq bìac 'ngah 'ngai ca dađeh. Baq Au chaq bìac 'ngah 'ngai am ca Au wa cla Haq chaq wa broq rìm bìac am Au. <sup>51</sup> Joq 'nàng, joq 'nàng, Au doi ca pì: Tàng mangai leq wèq cajap bàu Au, haq ùh jò leq cachit.”

<sup>52</sup> Mangai Yothaiq doi: “Manàiq cô nhèn hnoq ro joq 'nàng i kiac òi ti Ìh. Ap-ra-ham khi cachit. Wì mangai capoch thai da Boc Plình hadai khi cachit, mahaq Ìh doi: Tàng mangai leq wèq cajap bàu Au, ùh jò leq cachit 'mòh? <sup>53</sup> Ìh broq càn yi hnao ca boc nhèn Ap-ra-ham wa 'bài mangai capoch thai da Boc Plình ma khi cachit 'mòh? Ìh xoh dađeh cabô?”

<sup>54</sup> Chuaq Jêxu doi: “Tàng Au padèch dađeh, can 'ngah 'ngai aih ùh loh cleq. Mahaq cla Baq Au padèch Au. Aih Haq pì ma xôq creo Boc Plình da pì, <sup>55</sup> mahaq pì ùh loq ca Haq, mahaq Au loq ca Haq. Tàng Au doi: Au ùh loq ca Haq, Au broq mangai capoch amòng tìah ca pì, mahaq Au loq ca Haq wa iu tiaq bàu Haq. <sup>56</sup> Boc pì, Ap-ra-ham bùi gòm ngèh jah hnoq hì da Au. Haq khi hnoq hì lem bùi òi jaq!”

<sup>57</sup> Wì mangai Yothaiq doi ca Haq: “Ìh 'nhòq trùh 50 hanam, hagleq Ìh khi hnoq Ap-ra-ham?”

<sup>58</sup> Chuaq Jêxu doi: “Joq 'nàng, joq 'nàng, Au doi ca pì: Adroi ca jò 'nhòq i Ap-ra-ham, Au, khoi i Au.” <sup>59</sup> Wì tóch hmu padon tèm jêh cađac Haq, mahaq Chuaq Jêxu lam hlêp, loh khoi enh Hnem Cùh Waiq.

## 9

### *Mangai Ûh Xau Jah Brêh*

<sup>1</sup> Jò Chuaq Jêxu lam ti trong, Haq hnoq mòiq ngai ùh xau mat enh jò xa-ông. <sup>2</sup> Wì mangai hóc tiaq bòch Haq: “Thài, cabô khoi broq tôiq, mangai cô, loq miq baq haq ma broq ca haq ùh xau mat 'màng cô?”

<sup>3</sup> Chuaq Jêxu doi: “Ùh xài wì broq tôiq, mangai cô loq miq baq haq, mahaq khoi xa-ông haq ùh xau mat waq ca mahno biac Boc Plình ôi ti haq. <sup>4</sup> Jò xôq ôi dahì, bèn phai broq biac Boc Plình, Haq ma khoi thê Au trùh, taiq jò damang trùh, ùh i ca mangai jah broq hòm. <sup>5</sup> Jò Au xôq ôi ta crông taneh, Au Can 'Nghah ca con mangai ôi crông taneh.”

<sup>6</sup> Jò haq khoi doi bàu cô gêh, Haq cachôh ta taneh, yốc tráp xút ta mat mangai ùh xau, <sup>7</sup> hi doi ca haq: “Lam beq, 'nheo ta 'bau diac Si-lô-am!” Si-lô-am, aih i hiniq: “Jah Thê Lam”. 'Màng aih, haq lam trùh 'bau aih, 'nheo. Hi khoi, haq hlài, èh haq jah hnoq.

<sup>8</sup> Wì mangai haten hatia haq wa wì mangai adroi cô nêh hnoq haq axìn, doi: “Cô i joq mangai ma axìn adroi cô nêh 'mòh?” <sup>9</sup> 'Nah ngai wì doi: “Hi loq ca haq raq.”

I ngai doi: “Ùh xài, mòiq ngai 'noiç tìah ca haq.”

Mangai ùh xau doi: “Au cô raq.”

<sup>10</sup> Wì bòch haq: “Broç 'màng leq mat ìh ma jah xau hnoç?”

<sup>11</sup> Haq padreo bàu doi: “I Mangai hiniç Haq Chuaç Jêxu, broç tráp xùt ta mat au, wa doi: Lam trùh 'bau Si-lô-am 'nheo beç! 'Màng aih, au lam trùh 'nheo ti aih, khi òh au jah hnoç.”

<sup>12</sup> Wì bòch: “Mangai aih ta leq?”

Haq doi: “Au ùh 'nì.”

<sup>13</sup> Wì 'ràng mangai ma adroi khi ùh xau mat aih, trùh ti wì Pha-ri-si. <sup>14</sup> Hì Chuaç Jêxu ma broç tráp xùt ta mat mangai cô jah hnoç, aih hì Sabat. <sup>15</sup> Mangai Pha-ri-si bòch hòm haq: “ 'Màng leq ìh ma jah hnoç?” Haq doi: “Mangai aih xùt tráp ti mat au, au 'nheo, manàiq au jah hnoç.”

<sup>16</sup> I wì òi ta mangai Pha-ri-si doi: “Mangai cô ùh xài loh enh Boc Plình. Ma jah 'màng aih Haq ùh tiaç ranenh hì Sabat.”

Mahaç i wì ma 'noiç doi: “Mangai dù broç 'màng leq ma jah broç bìac halac?” Khi òh wì axong tajraq hlài ca dabau.

<sup>17</sup> Wì doi ca mangai ùh xau mat mòiq yàng hòm: “Mangai ma broç brêh ca ìh, ìh doi Haq cabô?”

Haq tèo: “Haq mangai capoch thai Boc Plình.”

<sup>18</sup> Mahaç wì mangai Yothaiç ùh lùì mangai aih adroi ùh xau mat, manàiq jah xau hnoç, trùh jò wì creò ca miç baç haq trùh ti wì. <sup>19</sup> Wì bòch wa: “Cô i joç con calô chòp ma khi òh xau mat enh jò xa-ông ùh? Manàiq cô broç 'màng leq haq ma jah xau hnoç?”

<sup>20</sup> Miq baq haq doi: “Ma loq cô con calô ma. Haq khi ùh xau mat enh jò xa-ông, <sup>21</sup> mahaq manàiq cô, 'màng leq haq jah xau hnoq, ma jì ùh 'nì. Cabô broq mat haq jah xau hnoq ma jì ùh 'nì. Pì bòch haq beq. Cla haq jah anoi hlài taiq haq khi càn.” <sup>22</sup> Miq baq haq doi 'màng aih taiq wa yùq crè ca mangai Yothaiq taiq wì khi doi: “Tàng i mangai leq doi Chuaq Jêxu, Haq Crich, wì hnan cađac haq loh enh gung ca hnem tagop.” <sup>23</sup> Taiq nen aih, miq baq haq ma khi doi: “Pì bòch haq beq, haq ùh xài con 'yoh!”

<sup>24</sup> Mòiq yàng hòm, wì mangai Pha-ri-si creo ca mangai adroi ma ùh xau mat, doi ca haq: “Manàiq cô ìh manè pôi Boc Plình beq. Nhèn loq Mangai aih, Haq Màngai tôiq lô.”

<sup>25</sup> Haq padreo hlài bàu tèo wì: “Au ùh 'nì haq i joq mangai i tôiq loq ùh, mahaq i mòiq biac au ma loq joq 'nàng. Adroi au ùh xau mat, manàiq cô au khi jah xau hnoq.”

<sup>26</sup> Wì bòch hòm haq: “Haq broq 'màng leq ma brêh ca mat ìh?”

<sup>27</sup> Haq tèo: “Au khi doi ca pì adroi, pì ùh chiuq tamàng. Gleq ma jah waq ca tàng tam hòm? Pì enh chaq trong broq mangai hõc tiaq Haq 'mòh?”

<sup>28</sup> Wì lech hanip haq doi: “'Màng aih, ìh mangai hõc tiaq Haq. Nhèn mangai hõc tiaq Môise. <sup>29</sup> Nhèn loq Boc Plình khi doi ca Môise, mahaq Mangai aih nhèn ùh 'nì Haq loh enh leq.”

<sup>30</sup> Mangai ùh xau padreo hlài bàu doi: “Au hamàih ta manoh! Mangai cô broq brêh ca mat au, mahaq pì ùh 'nì Haq loh enh leq! Aih joq

halac halùai! <sup>31</sup> Bèn loq, Boc Plình ùh tamàng wì mangai i tôiq, mahaq mangai ma leq cùh waiq Haq wa broq tiaq bàu Haq, Haq tamàng. <sup>32</sup> Enh calah trùh manàiq, ùh lah tàng i mangai leq ma broq brêh ca mangai ùh xau mat enh jò xa-ông ca haq. <sup>33</sup> Tàng Mangai cô ùh loh enh Boc Plình, Haq ùh jah broq biac cleq.”

<sup>34</sup> Wì lech ca Haq: “Ìh joq 'nàng mangai bình tôiq lôi enh jò xa-ông, mahaq ìh enh hnài nhèn 'mòh?” Khoi ca aih, wì hnan cađac haq loh enh gùng ca hnem tagop.

<sup>35</sup> Chuaq Jêxu tàng wì khoi hnan cađac haq loh enh gùng, èh jò chaq hnoq haq, hi bòch: “Ìh i manoh lùì canòm Con Mangai ùh?”

<sup>36</sup> Haq tèo: “Thài ôi, Con Mangai aih cabô ðòiq Au lùì Haq?”

<sup>37</sup> Chuaq Jêxu doi: “Ìh khoi hnoq Haq. Manàiq cô Haq 'nang capoch tùang ca ìh.”

<sup>38</sup> Haq doi: “Waiq Chuaq, au lùì ìh.” Hi khoi, haq cùh waiq Chuaq Jêxu.

<sup>39</sup> Chuaq Jêxu doi: “Au trùh ðòiq hadrah crống taneh cô ðòiq broq mangai ma ùh xau mat jah xau hnoq, mangai xau hnoq wìa mangai ùh xau mat.”

<sup>40</sup> 'Bài mangai Pha-ri-si ôi ta aih tàng bàu aih. Tajòì 'mòì wì bòch: “Ìh doi ðiq ca nhèn cô hadai ùh xau 'mòh?”

<sup>41</sup> Chuaq Jêxu doi: “Tàng pì mangai xau, èh pì ùh i ca tôiq cleq, mahaq taiq pì doi: Nhèn mangai ma hnoq, tôiq pì xôq ôi raq.”

# 10

## *Mangai Ban Trùu Lem Linh*

<sup>1</sup> “Au doi ca pì bàu joq 'nàng: Mangai leq mùt ta cadrong trùu, ùh mùt trong 'mang, mahaq heo trong 'noiç, mangai aih mangai atùng. <sup>2</sup> Mahaq mangai mùt ti 'mang ngo, haq mangai ban trùu. <sup>3</sup> Mangai gòm 'mang ngo pèh 'mang am ca haq wa trùu canao ca bàu haq. Haq creò hiniç tang toq trùu haq, 'nong trùu loh enh gùng. <sup>4</sup> Jò haq khi 'nong trùu loh enh gùng, haq lam adroi wa trùu tiaq haq taiç trùu canao ca bàu haq. <sup>5</sup> Trùu ùh tiaq mangai ùh canao, mahaq trùu cadàu mot, taiç trùu ùh canao ca bàu mangai ùh canao.”  
<sup>6</sup> Chuaq Jêxu capoch bàu cô, mahaq wì ùh 'nì tàng Haq enh doi cleq.

<sup>7</sup> Chuaq Jêxu doi hòm ca wì: “Joa 'nàng, joq 'nàng, Au anoi ca pì: Au cô raq 'mang da trùu. <sup>8</sup> Dìç đống wì ma trùh adroi ca Au, wì aih mangai atùng, 'màng aih trùu ùh tàng dì tiaq wì? <sup>9</sup> Au cô 'mang, mangai leq mùt 'mang Au, haq jah dèch. Mangai aih jah mùt loh glàm nhat. <sup>10</sup> Mangai atùng trùh đoiç atùng, jêh wa raliang đac. Au trùh waq ca trùu jah i can rìh, aih can rìh joq 'nàng.

<sup>11</sup> “Au cô Mangai ban trùu lem linh. Mangai ban trùu lem linh cadac dèh can rìh waq ca trùu jah rìh. <sup>12</sup> Mahaq mangai caq cùng, ùh xài mangai ban trùu, wa trùu aih ùh xài trùu haq, jò haq cô hnoç coq brì trùh, haq hi cadac trùu cadàu hloi. Coq brì rùp cap caq trùu wa hnan wì loh tac mac. <sup>13</sup> Ma jah 'màng aih haq mangai



ban trùu caq cùng, 'màng aih haq ùh hèm trùh ca trùu.

<sup>14</sup> “Au cô Mangai ban trùu lem linh. Au canao ca trùu Au, trùu Au canao ca Au. <sup>15</sup> 'Màng ca Baq loq ca Au, Au loq ca Baq. Au cađac dèh can rìh òiđiđ dèch dèh trùu. <sup>16</sup> Òi i trùu ma 'noiđ hòm, ùh òi ta calùh cô. Au phai 'ràng wì hadai jah hlài òiđ. Trùu aih jah tàng bàu Au, 'màng aih, jah i mòiđ calùh trùu wa mòiđ Ngai ban. <sup>17</sup> Baq loq waq ca Au taiđ Au cađac dèh can rìh òiđiđ jah yóc hlài. <sup>18</sup> Ùh i ca cabô jah yóc can rìh Au, mahaq taiđ cla Au to am. Au i cwìang cađac dèh can rìh, wa i cwìang yóc hlài. Baq Au khoi thê 'màng aih.”

<sup>19</sup> Wì mangai Yothaiđ axong ca dabau taiđ Haq capoch bàu aih. <sup>20</sup> I bàc ngai doi: “Haq i can kiac òi ti Haq, Haq loh ca ranhù. Gleđ pì ma tamàng Haq?”

<sup>21</sup> Wì ma 'noiđ doi: “'Màng aih, ùh xài bàu capoch da mangai i kiac òi ti haq. 'Màng leđ can kiac ma jah brođ brêh ca mangai ùh xau mat?”

### *Lè Brođ Hadròih Hnem Cùh Waiđ*

<sup>22</sup> Wop jò aih ta phòđ Jê-ru-sa-lem i lè Brođ Hadròih Hnem Cùh Waiđ. Aih jò ralim òi ta Jê-ru-sa-lem. <sup>23</sup> Chuađ Jêxu lam ba'yàt ta Hnem Cùh Waiđ enh ca'nàm pra Sa-lô-môn. <sup>24</sup> Wì mangai Yothaiđ yòng wawenh ca Haq bòch Haq: “Ìh brođ ca nhèn chiuđ hèm ta manoh ùh ro trùh jò leđ? Tàng Ìh jođ Crich, phai doi ca nhèn ma ro.”

<sup>25</sup> Chuađ Jêxu tèo wì: “Au khoi doi ca pì adroi, mahaq pì ùh lùì Au! Òiđ ca bìac halac ma Au

broq canòm hiniq Baq Au, aih biac patô Au cabô.  
<sup>26</sup> Mahaq pì ùh lùì Au, taiq pì ùh xài trìu Au.  
<sup>27</sup> Trìu Au tamàng bàu Au wa Au loq ca wì haq  
 wa wì haq tiaq Au. <sup>28</sup> Au am ca wì can rìh hloi  
 hloi, èh wì ùh hnhung; ùh i mangai leq jah atùng  
 yóc wì khoi enh tì Au. <sup>29</sup> Baq Au ma khoi am trìu  
 aih ca Au, Haq ma yi càn dõng; ùh i cabô jah yóc  
 atùng trìu aih khoi enh tì Baq Au. <sup>30</sup> Au wa Baq  
 Au khoi mòiq.”

<sup>31</sup> Mòiq yàng hò m wì mangai Yothaiq yóc hmu  
 padon tèm jêh cađac Haq. <sup>32</sup> Chuaq Jêxu doi:  
 “Nhò Baq Au, Au khoi broq biac lem bacc enh  
 ngìa ca pì. I biac ma leq ma broq pì chaq trong  
 tèm hmu jêh cađac Au?”

<sup>33</sup> Wì mangai Yothaiq padreo hlài bàu doi: “Aih  
 ùh xài taiq Ìh broq biac lem ma nhèn enh tèm  
 hmu Ìh, mahaq taiq Ìh capoch bàu ha'nhèq ðùng  
 trùh Boc Plình. Ìh mangai, mahaq Ìh doi dađeh  
 Boc Plình.”

<sup>34</sup> Chuaq Jêxu tèo: “Khoi achìh ta ranenh da  
 pì: ‘Au doi: cla pì 'bài yiang, ajoq?’” <sup>35</sup> Tàng  
 Haq creò wì haq ma jah bàu Boc Plình ma anoi  
 trùh: Wì 'bài yiang, wa tàng Sech Hadròih ùh jah  
 cađac, <sup>36</sup> èh Au cô, ma Baq khoi ràih loh hadròih  
 thê trùh ta crõng taneh, toq doi: ‘Au cô Con Boc  
 Plình, gleq pì ma jah kian Au doi, Au capoch 'mèq  
 ca Boc Plình?’ <sup>37</sup> Tàng Au ùh broq biac da Baq  
 Au, pì paq lùì Au, <sup>38</sup> mahaq tàng Au broq biac  
 Baq Au, 'nhac ca pì ùh lùì Au, pì phai lùì biac  
 halac Au ma broq beq, ðòiq pì loq Baq òi enh  
 dalam ca Au, Au òi enh dalam ca Baq.” <sup>39</sup> Wì

✧ **10:34** 10:34 BCP 82:6.

xôq chaq trong rùp Haq, mahaq Haq claih khoi ca tì wì.

<sup>40</sup> Haq cwa pah tau cròng diac Jôđan, mùt ta nòi Jon ma baxèm broq 'baptem. Haq ôi ta aih.

<sup>41</sup> Wì bàc ngai trùh ti Haq. Wì doi ca dabau: “Jon ùh lah broq teo halac cleq, mahaq rìm nà Jon anoi hlài bìac Mangai cô, haq capoch dìq troq đống.” <sup>42</sup> Ôi ta nòi aih i bàc ngai lùì Haq.

## 11

### *Bìac La-xa-ru Cachìt hi Rìh Hlài*

<sup>1</sup> I mòiq ngai hiniq haq La-xa-ru ôi ta gùng 'Bê-tha-ni, plài da baiq ngai oh daq Mari wa Mathê.

<sup>2</sup> Aih Mari ùc dầu xua thùm ca Chuaq Jêxu, haq yõc xàc gàu haq xùt jènh Chuaq Jêxu. Daq haq La-xa-ru, ùh hrõc. <sup>3</sup> 'Màng aih, wa oh daq baiq ngai thê mangai lam doi ca Chuaq Jêxu: “Chuaq ôi, mangai ìh ma loq waq ca haq, haq ùh hrõc.”

<sup>4</sup> Jò Chuaq Jêxu tàng bàu cô, Haq doi: “Haq ùh hrõc 'màng cô ùh hìaq cachìt òh, mahaq bìac aih waq ca Boc Plình jah 'ngah 'ngai lem lình, wa Con Haq nhò aih hadai jah lem lình 'ngah 'ngai.”

<sup>5</sup> Chuaq Jêxu loq waq ca Mathê, Mari wa La-xa-ru. <sup>6</sup> Jò Haq tàng wì doi La-xa-ru ùh hrõc, Haq ôi tam nòi Haq ma 'nang ôi aih baiq hì hòm. <sup>7</sup> Hì khoi Haq doi ca wì mangai hõc tiaq Haq: “Beq bèn hlài ta gùng Judìa.”

<sup>8</sup> Wì mangai hõc tiaq doi: “Thài ôi! Wì mangai Yothaiq neo adroi cô chaq trong tèm hmu jèh cađac ìh. Manàiq, gleq ìh ma waq ca hlài ta aih hòm?”

<sup>9</sup> Chuaq Jêxu doi: “Dahì i 12 jò, joq ùh? Tàng i mangai lam dahì, haq ùh catõih cro, taiq haq jah hnoq can 'ngah da crõng taneh cô. <sup>10</sup> Mahaq tàng haq lam damang, haq jah catõih cro taiq ùh i ca can 'ngah.”

<sup>11</sup> Hi khoi Haq doi hòm: “La-xa-ru bua bèn 'nang cùi, mahaq Au padon lam padriù haq riù.”

<sup>12</sup> Wì mangai hõc tiaq Haq doi: “Chuaq ôi! Tàng haq cùi, haq jah brêh.” <sup>13</sup> Mahaq Chuaq Jêxu enh doi: “Haq cùi aih, haq cachit.” Wì xoh dèh Haq doi La-xa-ru cùi joq 'nàng.

<sup>14</sup> 'Màng aih Chuaq Jêxu doi ro ca wì: “La-xa-ru khoi cachit. <sup>15</sup> Mahaq taiq pì, Au bùi Au ùh õi ta aih òoiq pì lùì. Mahaq bèn lam ti haq beq.”

<sup>16</sup> Thôma, (hadai i hiniq: Con Camia), doi ca wì mangai hõc tiaq: “Bèn lam beq! Tàng bèn cachit èh, dìq ca bèn hadai cachit pajùm ca Chuaq Jêxu.”

<sup>17</sup> Jò Chuaq Jêxu lam trùh nòi, Haq hnoq wì catùh La-xa-ru õi ta ralùng xam hmu khoi pôn hì! <sup>18</sup> 'Bê-tha-ni cadan ca Jê-ru-sa-lem, piq kê sôq. <sup>19</sup> I bàc ngai Yothaiq khoi lam hmàih ca Mari wa Mathê òoiq alòng wa haq biác daq wa cachit. <sup>20</sup> Jò Mathê tàng wì doi, Chuaq Jêxu trùh, Mathê loh òoiq Haq. Mari ha'ngui ta hnem.

<sup>21</sup> Mathê doi ca Chuaq Jêxu: “Chuaq ôi! Tàng ìh khoi õi ta cô hì adroi, daq au ùh cachit!

<sup>22</sup> Manàiq cô au loq, Boc Plình xôq am ca ìh biác cleq ìh xìn Haq.”

<sup>23</sup> Chuaq Jêxu doi ca haq: “Daq ìh jah rìh hlài.”

<sup>24</sup> Mathê doi: “Au loq, hì ma atiq lùch jò wì dìq dõng rìh hlài, daq au hadai rìh hlài.”

<sup>25</sup> Chuaq Jêxu doi ca haq: “Au cô can rih hlài wa can rih. Mangai leq ma lùì Au, 'nhac ca khi cachit, haq xôq jah rih. <sup>26</sup> Mangai leq rih, haq lùì Au, èh ùh hìaq cachit. Ìh lùì bìac aih ùh?”

<sup>27</sup> Haq doi ca Chuaq: “Jòq, Chuaq, Au lùì Ìh Crich, Con Boc Plình, Haq ma phai trùh cróng taneh.”

<sup>28</sup> Doi hì gêh, Mathê hlài, bahech ca Mari: “Thài khi trùh òi jang tau. Haq creò ca oh lam atau.” <sup>29</sup> Jò Mari tàng bàu cô, haq yòng 'mòi ca renh lam trùh ti Haq. <sup>30</sup> Jò aih, Chuaq Jêxu 'nhòq mùt ta plài. Haq xôq òi ta nòi ma Mathê khi glàm Haq. <sup>31</sup> Jò wì mangai Yothaiq ma ha'ngui ti Mari òi ta hnem alòng haq, wì hnoq Mari yòng renh loh enh gùng, wì xoh dèh haq lam hmoi dèh ca daq. Wì lam tiaq haq.

<sup>32</sup> Mari trùh ta nòi Chuaq Jêxu òi. Jò hnoq Haq, Mari hacùn cràng ta taneh ajènh Haq. Mari doi: “Chuaq òi, tàng i Ìh òi ta cô, daq au ùh cachit!”

<sup>33</sup> Jò Chuaq Jêxu hnoq Mari hmoi wa mangai Yothaiq lam tiaq Mari hadai hmoi, Haq ua-ac ta manoh, xa-öch diq jaq. <sup>34</sup> Haq bòch: “Pì khi òi haq òi ti leq?”

Wì doi: “Lam ta cô, Chuaq jah hnoq.”

<sup>35</sup> Chuaq Jêxu hmoi.

<sup>36</sup> Wì mangai Yothaiq doi: “Ngan tau, Haq loq waq ca La-xa-ru dàng leq.”

<sup>37</sup> Mahaq 'nah ngai doi: “Haq ma khi broq ca mangai ùh xau mat jah hnoq, Haq ma ùh jah broq ca mangai cô jah rih hlài 'mòh?”

<sup>38</sup> Yàng cô Chuaq Jêxu ua-ac manoh hòm, lam trùh ti còp hmu. I hmu càn òi gùp jang trom

'ngah ralùng. <sup>39</sup> Chuaq Jêxu doi: “Cadro hmu beq!”

Mathê, oh mangai ma khoi cachit doi: “Thài ôi, manaiq cô hanang khoi xua. Haq cachit khoi pôn hì!”

<sup>40</sup> Chuaq Jêxu doi ca haq: “Au khoi doi ca ìh, tàng ìh lùì Au, ìh jah hnoq biac 'ngah 'ngai da Boc Plinh 'mòh?”

<sup>41</sup> Khoi ca aih wì cadro hmu. Chuaq Jêxu ngoi ta plinh, Haq doi: “Baq ôi, Con manè Ìh, ma jah 'màng aih Ìh khoi tàng bàu Con. <sup>42</sup> Au loq Ìh yôt yôt tamàng Au, mahaq Au doi 'màng cô, waq ca wì ma 'nang yòng jang cô jah lùì Ìh thê Au trùh ta cô.”

<sup>43</sup> Jò Haq anoi khoi gêh, Haq creò bàu dêh: “Ô La-xa-ru, loh enh gùng beq!” <sup>44</sup> Mangai khoi cachit loh enh gùng. Tì jènh haq càt xam bai xom, hadrò haq xôq ỏi tù mù.

Chuaq Jêxu doi: “Dõih da haq ðòiq haq hi lam!”

<sup>45</sup> I bàc mangai Yothaiq ma khoi ỏi ti Mari, jò wì hnoq Chuaq Jêxu broq biac cô, wì lùì Chuaq Jêxu. <sup>46</sup> Mahaq i toq 'biaq ngai lam trùh ta wì Pha-ri-si, anoi hlài ca wì biac Chuaq Jêxu ma khoi broq. <sup>47</sup> 'Màng cô wì pajàu càn wa mangai Pha-ri-si, tagop ti 'bài craq hadrah ha'nhèq.

Wì doi: “Bèn phai broq cleq, ma jah 'màng aih mangai cô broq teo halac bàc? <sup>48</sup> Tàng bèn ðòiq ca Haq ỏi aiq, wì ðiq dõng jah lùì Haq, khoi èh lình mangai Rôma ta'miaq yõc da bèn Hnem Cùh Waiq, wa gùng bèn.”

<sup>49</sup> Õi ti wì, i mòiq ngai hiniq haq Caiphe, pajàu ha'nhèq hanam aih, doi: “Pì ùh 'nì loq leq!  
<sup>50</sup> Gleq pì hèm ma ùh loh, tàng i mòiq ngai cachit thai dìq ca jàn, aih yi hnao dìq dõng ca jàn bèn raliang cađac.”

<sup>51</sup> Ùh xài bàu cla Haq capoch 'màng aih, mahaq taiq nen haq broq pajàu ha'nhèq hanam aih, haq capoch bàu loq adroi ca biac Chuaq Jêxu padon cachit thai ca jàn Yothaiq. <sup>52</sup> Ùh xài toq mangai Diac cô, mahaq waq ca jah 'ràng wì con caiq Boc Plinh broq mòiq pajùm ca 'bài con caiq da Boc Plinh ma khoi pac lac. <sup>53</sup> Pàng hì aih ta èh, wì chaq trong jêh cađac Chuaq Jêxu.

<sup>54</sup> Pàng aih, Chuaq Jêxu ùh jah lam hlài ro rang enh ngia ca wì mangai Yothaiq hòm. Haq cađac nòi aih, mùt hlèp òi ta phôq Êp-ra-im, haten ca nòi ãng hawit, pajùm ca wì mangai hõc tiaq Haq.

<sup>55</sup> Jò aih, Lè Lam Cwa Yothaiq ten trùh. I bàc ngai loh enh bàc gùng, lam ta Jê-ru-sa-lem adroi ca hì lè, padon dađeh broq mangai hadròih enh ngia ca Chuaq. <sup>56</sup> Wì chaq Chuaq Jêxu, bòch dabau jò wì yòng òi ta Hnem Cùh Waiq: “Pì hèm 'màng leq? Haq ùh trùh ta lè cô joq ùh?” <sup>57</sup> Wì pajàu càn wa mangai Pha-ri-si khoi ca'naih bàu: Mangai ma leq loq ca Chuaq Jêxu òi ta leq, thè doi ca wì, waq ca wì jah rùp cật Haq.

## 12

*Mari Yõc Dàu Thùm Xùt Jènh Haq  
 (Mat 26:6-13; Mõc 14:3-9)*

<sup>1</sup> Tadràu hì adroi ca Lè Lam Cwa, Chuaq Jêxu trùh 'Bê-tha-ni, aih nòi La-xa-ru, mangai ma khi cachit ma Chuaq Jêxu broq haq rih hlài. <sup>2</sup> Wì padon ca Chuaq Jêxu caq hiniang ta aih. Mathê patih ca wì wa La-xa-ru pajùm 'bài mangai 'noi q ha'ngui caq ôq pajùm ta ca'bông ti Chuaq Jêxu. <sup>3</sup> Jò cô, Mari yôc mòi q 'ne kì q jreo xua thùm canaq di q jaq, ùc ta jènh Chuaq Jêxu. Khi ca aih, haq yôc dèh xàc xùt jènh Chuaq. Dì q ca hnem jah xua jreo cô.

<sup>4</sup> Mahaq Juda Ich-ca-ri-ôt, mangai hóc tiaq, atì q haq blò q Chuaq, doi: <sup>5</sup> "Gleq ma ùh tech jreo xua thùm cô jah 300 ðùng ðê-na-ri ðòi q am ca mangai pa?" <sup>6</sup> Haq doi 'màng aih, ùh xài haq hèm trùh wa xa-ôch ca mangai pa, mahaq haq mangai atùng. Haq wè q caxop 'bac wì, èh haq yôc atùng 'nah 'bac aih.

<sup>7</sup> Mahaq Chuaq Jêxu doi: "Ðòi q da haq beq. Haq khi wè q jreo cô ca hì xùt catùh Au! <sup>8</sup> Ma jah 'màng aih pì jò leq xô q i mangai pa ôi ta pì, ✧ mahaq Au ùh ôi hloi ta pì."

<sup>9</sup> I bàc ngai Yothai q tàng wì doi, Chuaq Jêxu ôi ta 'Bê-tha-ni. Wì lam trùh, ùh xài wì chaq hnoq Chuaq Jêxu hê q, mahaq wì hadai waq ca hnoq La-xa-ru, mangai Chuaq Jêxu khi broq haq rih hlài. <sup>10</sup> Mahaq 'bài pajàu càn hatinh ca dabau, hadai chaq trong jêh cađac La-xa-ru, <sup>11</sup> tai q La-xa-ru, bàc ngai Yothai q khi cađac wì haq, èh lùì tiaq Chuaq Jêxu.

### *Wì ðìh Yôc Chuaq Jêxu Mùt Jê-ru-sa-lem*

---

✧ **12:8** 12:8 RAH 15:11.



<sup>12</sup> Loh hì atìq, hìa tìn Chuaq Jêxu hadai tǒc Jê-ru-sa-lem. Wì mangai pajùm bàc lam caq Lè Lam Cwa, <sup>13</sup> wê acòng rêq lam ðìh Chuaq Jêxu. Wì cachech ðêh bàu doi:  
“Hô-sa-na!”

“Am xôq ramǒt ca Haq ma canòm ca hiniq Chuaq lam trùh, ✧ aih Bùa jàn Is-ra-ên!”

<sup>14</sup> Chaq hnoq mòiq toq con lùa, Haq còi lùa aih, 'màng ca Sech Hadròih khoi achìh:

<sup>15</sup> “Ô mangai Siôn, apaq crè hòm.

Bùa ìh còi lùa con 'nang lam trùh.” ✧

<sup>16</sup> Jò baxèm, 'bài mangai hǒc tiaq Haq ùh 'nì tàng biac cô, mahaq jò Chuaq Jêxu khoi jah 'ngah 'ngai lem linh, khoi èh, wì hmàng hlài brong Sech Hadròih khoi i achìh biac Haq. Wì hnoq joq khoi xit ca Haq.

<sup>17</sup> Wì ma khoi òi ti Chuaq Jêxu jò Haq creo La-xa-ru loh enh ralùng hanang broq haq rìh hlài, xôq anoi yôt biac cô. <sup>18</sup> Jò cô wì mangai pajùm loh enh phôq ðìh Haq, taiq wì khoi tàng bàu anoi hlài, Chuaq Jêxu khoi broq teo halac aih.

<sup>19</sup> Mahaq wì mangai Pha-ri-si capoch tùang ca dabau doi: “Hnoq ùh? Bèn ùh broq jah cacleq! Dìq ðǒng ca phù cròng khoi lam tiaq Haq!”

### *Chuaq Anoi Adroi Biac Haq Cachit*

<sup>20</sup> Ta'nàih ca lè cô, hadai i 'bài mangai Hilap lam ti wì tǒc ðòiq cùh waiq Boc Plinh. <sup>21</sup> Wì lam glàm Philip, mangai phôq 'Bêt-sai-đa òi ta gùng Ga-li-lê, doi ca haq: “Ôi thài, nhèn enh hnoq

✧ **12:13** 12:13 BCP 118:25,26. ✧ **12:15** 12:15 Xach 9:9.

Chuaq Jêxu.” <sup>22</sup> Philip lam doi ca Anrê, hi khoi wa baiq ngai, Anrê wa Philip lam doi ca Chuaq Jêxu.

<sup>23</sup> Chuaq Jêxu padreo bàu doi: “Khoi trùh jò Con Mangai jah 'ngah 'ngai lem linh. <sup>24</sup> Au doi ca pì bàu joq 'nàng, jò rai adrech, tàng adrech clih ta taneh ùh cachit, èh adrech aih mòiq pliang xôq òi dèh mòiq pliang, mahaq tàng cachit, èh men jah loh bàc. <sup>25</sup> Mangai leq loq waq dèh ca can rih dadeh, èh jah hnhung. Mahaq mangai ma leq cađac dèh can rih òi 'nhòng cô, èh jah wèq hlài ta 'nhòng rih hloi hloi. <sup>26</sup> Tàng mangai ma leq patih biac Au, èh phai tiaq Au. Au òi ti leq, mangai ma patih biac Au hadai òi ti aih. Mangai ma leq patih biac Au, èh Baq Au jah padèch haq.

<sup>27</sup> “Manàiq cô manoh Au mango dìq jaq. Au phai doi cleq? Waiq Baq, xin dèch Au khoi ca jò nan xa cô 'mòh? Mahaq taiq nen jò cô raq Au khoi trùh ta cô! <sup>28</sup> Baq ôi, xin broq 'ngah 'ngai hiniq ìh!”

Jò aih i bàu enh plình doi: “Au khoi broq 'ngah 'ngai hiniq Au, wa Au jah broq 'ngah 'ngai hiniq Au hòm!” <sup>29</sup> Mangai jàn ma yòng haten tàng bàu cô, doi: “Plình hilùng.” Wì ma 'noi q doi: “I mòiq 'bình plình capoch tàng ca Haq.”

<sup>30</sup> Chuaq Jêxu padreo hlài bàu doi: “Bàu cô loh enh plình, ùh xài waq ca Au tàng, mahaq waq ca pì tàng. <sup>31</sup> Crõng taneh cô khoi trùh jò hadrah. Manàiq jah hnan cađac kiac Satan, aih haq ma wèq crõng taneh cô. <sup>32</sup> Khoi èh, Au cô, jò chac Au khoi 'bìq atua tõi khoi ca taneh, Au jah creo

dìq ca mangai trùh ti Au.” <sup>33</sup> Haq doi bàu cô waq ca wì loq, èh Haq chiùq cachit 'màng leq.

<sup>34</sup> Wì padreo hlài bàu doi ca Haq: “Nhèn i tàng sech Ranenh khoi hnài doi: Chuaq Jêxu Crich òi i hloi hloi. Gleq Ìh ma jah doi: ‘Con Mangai phai 'biq atua tǒc’? Con Mangai aih cabô?”

<sup>35</sup> Chuaq Jêxu doi ca wì: “Can 'Nghah òi xreo ta'ne ca pì toq 'biaq hòm! Cadiang lam beq jò pì òi i Can 'Nghah, yùq can clam loh renh trùh traìq ti pì! Mangai lam ta nòi clam clôiq ùh 'nì dađeh lam ta leq. <sup>36</sup> Jò pì òi i Can 'Nghah, pì phai lùì Can 'Nghah, waq ca pì jah broq con caiq Can 'Nghah.” Chuaq Jêxu doi bàu cô, hì khoi Haq lam ta nòi hlèp hangai ca wì.

### *Bìac Mangai Yothaiq Ùh Lùì Chuaq*

<sup>37</sup> 'Nhac ca Haq khoi broq bàc teo halac enh ngìa ca wì, mahaq xôq wì ùh lùì Haq, <sup>38</sup> òiđiq bàu Êsai, mangai capoch thai Boc Pình, jah xit: “Waiq Chuaq, cabô ma khoi lùì bàu nhèn anoi hlài?

Wa capiang tì Chuaq khoi patô 'noh ca cabô?”<sup>☆</sup>

<sup>39</sup> Wì ùh jah lùì haq, taiq nen tìah ca Êsai khoi doi:

<sup>40</sup> “Haq khoi broq wì ùh xau mat,  
broq manoh wì cadoq,  
òiđiq i mat mahaq wì ùh xau hnoq,  
i manoh, mahaq wì ùh 'nì tàng;  
ùh wìh wìa trùh ti Au, waq ca Au broq brêh  
ca wì.”<sup>☆</sup>

<sup>☆</sup> **12:38** 12:38 Êsai 53:1. <sup>☆</sup> **12:40** 12:40 Êsai 6:10.

<sup>41</sup> Êsai doi bàu cô jò haq khoi hnoq bìac 'ngah 'ngai da Chuaq wa anoi hlài bìac Haq.

<sup>42</sup> Mahaq, òi ta wì ma broq cwan, i bàc ngai lùì Chuaq Jêxu; mahaq taiq wì yùq ca mangai Phari-si loq hnan wì loh khoi enh hnem tagop, wì ma jah ùh anoi pa'noh dađeh tiaq Chuaq, <sup>43</sup> taiq wì haq enh broq lem manoh da con mangai padèch, yi hnao ca broq lem manoh Boc Plình.

<sup>44</sup> Chuaq Jêxu capoch bàu dèh doi: “Mangai leq ma lùì Au, ùh xài toq lùì Au hêq, mahaq lùì Haq ma thê Au trùh ta cô. <sup>45</sup> Mangai leq hnoq Au, haq hnoq Haq ma thê Au trùh. <sup>46</sup> Au khoi trùh òiđiq broq Can 'Nghah ta crông tanèh, waq ca mangai leq ma lùì Au, ùh òi ti clam clòiq hòm.

<sup>47</sup> “Mahaq mangai leq tàng bàu Au mahaq ùh wèq bàu Au, èh ùh xài Au hadrah mangai aih, ma jah 'màng aih Au trùh ta cô, ùh xài òiđiq hadrah crông tanèh, mahaq waq ca dèch rôt hlài crông tanèh. <sup>48</sup> Mangai leq ma chòiq cađac Au wa ùh nhàn yóc bàu Au, èh khoi i bìac jah hadrah haq; bàu Au ma khoi hnài jah hadrah wì ta hì ma atiq lùch. <sup>49</sup> Ma jah 'màng aih, Au ùh i jò leq tiaq dèh manoh capoch, mahaq Baq, Haq ma khoi thê Au trùh, Haq ma thê Au capoch cleq wa doi 'màng leq. <sup>50</sup> Au loq bàu thê Haq, aih can rìh hloi hloi. 'Màng cô, bàu ma Au capoch, aih bàu ma Baq Au thê Au phai doi.”

## 13

### *Chuaq Jêxu 'Nheo Jènh Mangai Hóc Tiaq*

<sup>1</sup> Adroi ca hì Lè Lam Cwa, Chuaq Jêxu khoi loq ten trùh jò Haq cađac crông tanèh cô òiđiq hlài

dèh ta Baq. Haq khoi loq waq ca mangai da Haq òi crõng taneh, èh haq loq waq trùh hì atìq lùch.

<sup>2</sup> Jò wì 'nang acaq daxèq, can kiac Satan broq ca manoh Juda Ich-ca-ri-òt con Simôn òoìq blòq Chuaq Jêxu. <sup>3</sup> Chuaq Jêxu loq, Baq khoi òoìq ta tì Haq rìm bìac, ma jah 'màng aih Haq khoi trùh enh Boc Plình wa Haq ten hlài ta Boc Plình, <sup>4</sup> Haq yòng, lèh dèh eo enh gùng, càt mù jang ca'nam, <sup>5</sup> khoi èh, Haq ùc diac ta khai, hi khoi Haq 'nheo jènh dèh ca 'bài mangai hõc tiaq Haq. 'Nheo hi gèh, Haq yõc dèh mù ma càt ti ca'nam, hi xùt.

<sup>6</sup> Jò Haq trùh ti Simôn Pêtrô, Pêtrô doi ca Haq: “Chuaq ôi! Ìh 'nheo jènh au 'mòh?”

<sup>7</sup> Chuaq Jêxu doi ca Haq: “Bìac Au ma broq manàiq, ìh ùh 'nì. Atìq cô èh ìh ma loq.”

<sup>8</sup> Pêtrô padreo hlài bàu doi: “Ìh ùh jò leq jah 'nheo jènh au!”

Chuaq Jêxu doi ca haq: “Tàng Au ùh 'nheo jènh ìh, èh ìh ùh i ca phàn cleq ta Au.”

<sup>9</sup> Simôn Pêtrô doi ca Haq: “Chuaq ôi, Ìh ùh xài toq 'nheo jènh au hêq, mahaq 'nheo tì wa gàu au hadai!”

<sup>10</sup> Chuaq Jêxu doi ca haq: “Mangai leq khoi hùm, dìq ca chac haq khoi hreo, 'màng aih toq nhet 'nheo jènh hêq. Mahaq ùh xài pì dìq òng khoi jah hreo.” <sup>11</sup> Ma jah 'màng aih Haq loq cabô padon blòq Haq, ma jah Haq doi: “Ùh xài dìq òng ca pì khoi jah lem hreo.”

<sup>12</sup> Jò Haq khoi 'nheo dìq jènh wì, Haq caxùnh hlài dèh eo, ha'ngui ti wì haq, doi: “Pì aloq bìac Au ma neo broq ca pì ùh? <sup>13</sup> Pì creò Au cô Thài wa Chuaq, aih joq troq taiq cla Au joq 'nàng

'màng aih. <sup>14</sup> Tàng Au Chuaq pì wa Thài pì, khoi 'nheo jènh pì, pì phai 'nheo jènh dabau. <sup>15</sup> Ma jah 'màng aih Au khoi broq dua ca pì waq ca pì broq tiaq tiah ca Au. <sup>16</sup> Joq 'nàng, joq 'nàng, Au doi ca pì, mangai hapǒng ùh yi càn dèh ca craq haq, 'màng aih mangai lam akhen, ùh yi càn ca mangai ma thê haq lam. <sup>17</sup> Tàng pì loq ca biàc cô wa broq tiaq, èh pì jah xôq.

<sup>18</sup> “Ùh xài Au doi diq dǒng ca pì. Au loq ro 'bài mangai Au ma khoi ràih, mahaq biàc cô tiaq bàu Sech Hadròih ma achìh khoi jah xit: ‘Mangai caq 'benh Au, haq tawìh hlài blòq Au.’<sup>✧</sup>

<sup>19</sup> “Manàiq Au doi ca pì adroi, òdiq jò biàc cô jah trùh, pì jah lùì cla Au cô joq Crich. <sup>20</sup> Joq 'nàng Au doi ca pì: Cabô òh yǒc mangai leq Au khoi thê, aih haq òh yǒc Au. Tàng cabô òh yǒc Au, aih haq òh yǒc Boc Plinh ma khoi thê Au trùh ta cô.”

*Chuaq Jêxu Anoi Adroi Biàc Juđa Blòq Haq  
(Mat 26:20-25; Mǒc 14:17-21; Luc 22:21-23)*

<sup>21</sup> Chuaq Jêxu doi bàu cô gèh, mahua yiang Haq loh ca manhài. Haq doi ro: “Joaq 'nàng, joq 'nàng, Au doi ca pì, i mòiq ngai ta pì jah blòq Au.”

<sup>22</sup> Wì mangai hǒc tiaq ngan dabau, ùh 'nì Haq doi cabô.

<sup>23</sup> Òi ta wì mangai hǒc tiaq, i mòiq ngai Chuaq Jêxu ma loq waq ca haq. Jò aih haq ha'ngui haten ca Chuaq Jêxu. <sup>24</sup> 'Màng cô, Simôn Pêtrô ngan haq, cùh gàu, thê haq bòch Chuaq Jêxu patô anoi aih cabô.

---

<sup>✧</sup> **13:18** 13:18 BCP 41:9.

<sup>25</sup> Haq cachình dađeh ti rada Chuaq Jêxu hi bôch: “Chuaq ôi, cabô aih?”

<sup>26</sup> Chuaq Jêxu doi: “Aih mangai ma Au padon am ha'nech 'benh mì Au chùq ta diac hi am ca haq.” Khoi èh, Haq chùq ta diac mòiq ha'nech 'benh mì, am ca Juda con Simôn Ich-ca-ri-ôt.

<sup>27</sup> Wop jò Juda nhàn ha'nech cô, kiac Satan mùt hloi ta manoh haq.

Chuaq Jêxu doi ca haq: “Biác ma ìh broq, broq ma renh beq.” <sup>28</sup> Mahaq ùh i ca cabô ôi ta ca'bông acaq loq hagleq Chuaq ma doi 'màng aih. <sup>29</sup> Ma jah 'màng aih, taiq Juda mangai wèq 'bac, wì xoh đeh Chuaq Jêxu thê haq rôt dahwèq caq ca hì lè, loq yóc 'bac am ca wì mangai pa. <sup>30</sup> 'Màng aih, Juda yóc khoi caq ha'nech 'benh mì cô, tajòi 'mòi haq loh enh gùng. Jò aih khoi clam.

<sup>31</sup> Jò Juda khoi loh lam, Chuaq Jêxu doi: “Manàiq cô Con Mangai jah padèch ha'nhèq. Boc Plình hadai jah padèch ha'nhèq ôi enh dalam ca Haq. <sup>32</sup> Tàng Boc Plình jah padèch ha'nhèq ôi enh dalam ca Haq, èh Boc Plình jah padèch Con Mangai ôi enh dalam ca dađeh, èh Haq broq biác aih tajòi 'mòi.

<sup>33</sup> “Ôi 'bài con, Au ôi ti pì toq 'biaq hòm. Pì jah chaq Au, mahaq 'màng ca Au khoi doi ca wì mangai Yothaiq, manàiq Au hadai doi ca pì: Pì ùh jah lam ti nôi Au lam.

<sup>34</sup> “Au am ca pì bàu thê ma neo, aih pì phai loq waq ca dabau, 'màng ca Au khoi loq waq ca pì 'màng leq, pì hadai loq waq ca dabau 'màng aih.

<sup>35</sup> Tàng joq pì loq wa ca dabau, èh taiq bìac aih, phù cròng jah loq ca pì mangai hóc tiaq da Au.”

*Chuaq Doi Adroi, Pêtrô Chôiq Haq*  
(*Mat 26:31-35; Mốc 14:27-31; Luc 22:31-34*)

<sup>36</sup> Simôn Pêtrô doi ca Haq: “Chuaq ôi, ìh lam ta leq?”

Chuaq Jêxu doi: “Au lam ta leq, ìh ùh jah tiaq Au manàiq, mahaq hì atìq ìh jah tiaq Au.”

<sup>37</sup> Pêtrô doi: “Chuaq ôi, gleq manàiq Au ma ùh jah tiaq ìh? Taiq tiaq ìh Au hùà cachit!”

<sup>38</sup> Chuaq Jêxu doi: “Ìh hùà cachit taiq Au 'mòh? Joq 'nàng, Au doi ca ìh, ia 'nhòq rống, ìh hangah ùh loq ca Au piq yàng.”

## 14

*Chuaq Jêxu Hùaq Am Yiang Hadròih*

<sup>1</sup> “Manoh pì apaq hèm manhài. Pì khoi lùì Boc Plình, hadai phai lùì Au hòm. <sup>2</sup> Ôi ta hnem Baq Au, i bàc nòi ôi. Tàng ùh 'màng aih, Au khoi doi ca pì. Au lam padon am ca pì nòi ôi. <sup>3</sup> Jò Au khoi lam wa khoi padon am ca pì mòiq nòi, Au wìh hlài 'ràng pì lam ti Au, waq ca Au ôi ti leq, pì hadai ôi ti aih. <sup>4</sup> Pì loq Au lam ta leq wa pì loq ca trong Au lam.”

<sup>5</sup> Thôma doi ca Haq: “Chuaq ôi, nhèn ùh 'nì ìh lam ta leq, broq 'màng leq ma loq ca trong?”

<sup>6</sup> Chuaq Jêxu doi ca haq: “Cla Au cô Trong Lam, Bàu Joq 'Nàng, wa Xèm Can Rìh. Tàng ùh canòm ca Au, ùh i ca mangai leq jah trùh ti Baq. <sup>7</sup> Tàng pì khoi loq ca Au, pì hadai khoi loq ca Baq. Pàng cô ta èh, pì loq ca Haq wa khoi hnoq Haq.”



<sup>8</sup> Philip doi ca Haq: “Waiq Chuaq, xin patô nhèn jah hnoq Baq, aih khoi tôm tàu.”

<sup>9</sup> Chuaq Jêxu doi ca haq: “Philip, Au khoi ôi ta pì dùnh 'màng cô, mahaq ìh 'nhòq loq ca Au 'mòh? Mangai leq khoi hnoq Au, khoi hnoq Baq. 'Màng aih gleg ìh ma doi: Xin patô ca nhèn Baq?

<sup>10</sup> Ìh ùh lùì Au ôi enh dalam ca Baq, Baq ôi enh dalam ca Au 'mòh? Bàu Au ma anoi hnài pì, ùh xài au capoch đeh, mahaq cla Baq ôi enh dalam ca Au, Haq broq dèh biac Haq. <sup>11</sup> Jò leq Au doi, Au ôi enh dalam ca Baq, Baq ôi enh dalam ca Au, pì phai lùì bàu Au. Tàng ùh, èh pì ngan biac Au broq đòiq pì lùì. <sup>12</sup> Joq 'nàng, Au doi ca pì, mangai ma leq lùì Au, haq jah broq biac Au ma broq; haq hadai jah broq biac yi càn yi hnao ca aih hòm, ma jah 'màng aih Au hlài ti Baq. <sup>13</sup> Pì canòm hiniq Au ma waiq xin biac cleq, Au am ca pì, waq ca Baq jah 'ngah 'ngai ôi ti Con. <sup>14</sup> Pì canòm hiniq Au, ùh kè bòch cleq, Au broq am ca pì.

<sup>15</sup> “Tàng pì loq waq ca Au, èh pì wèq bàu thê da Au. <sup>16</sup> 'Màng cô Au jah bòch Baq, Haq jah am mòiq Yiang Jùp Đò ma 'noiç. Haq ôi ta pì hloi hloi, <sup>17</sup> Haq Yiang Hadròih Bàu Joq 'Nàng ma mangai crõng taneh ùh jah đìh yõc Haq taiq ùh hnoq Haq wa ji ùh loq ca Haq, mahaq pì loq ca Haq, ma jah 'màng aih Haq 'nang ôi ta pì. Haq jah ôi enh dalam ca pì. <sup>18</sup> Au ùh cađac pì broq mangai lac. Au jah hlài trùh ta pì. <sup>19</sup> ùh dùnh dàng leq hòm, mangai crõng taneh ùh jah hnoq Au hòm. Mahaq pì jah hnoq Au, ma jah 'màng aih Au rìh, pì hadai jah rìh. <sup>20</sup> Trom hì aih pì jah

loq, Au òi enh dalam ca Baq Au, pì òi enh dalam ca Au, Au òi enh dalam ca pì. <sup>21</sup> Mangai leq i bàu thê Au wa wèq bàu thê aih, aih mangai loq waq ca Au, èh Baq Au loq waq hlài. Au hadai loq waq ca haq wa mahno dađeh ca haq.”

<sup>22</sup> Juda mahaq ùh xài Ich-ca-ri-ôt, bòch Haq: “Chuaq ôi! 'Màng leq Ìh jah mahno dađeh ca nhèn, mahaq ùh mahno ca mangai crống taneh?”

<sup>23</sup> Chuaq Jêxu padreo hlài bàu doi: “Tàng i mangai loq waq ca Au, haq jah iu wèq bàu Au. Baq Au jah loq waq ca haq wa Ma jah trùh òi ti mangai aih. <sup>24</sup> Mangai ma leq ùh loq waq ca Au, ùh iu wèq bàu Au. Bàu cô pì ma tàng ùh xài bàu Au, mahaq loh enh Baq, Haq ma thê Au trùh ta cô.

<sup>25</sup> “Au khoi anoi ca pì bìac cô jò Au òi ta pì. <sup>26</sup> Mahaq jò Yiang Jùp Đò trùh, Haq Yiang Hadròih ma Baq canòm ca hiniq Au thê trùh, Haq jah hnài pì rìm trong òiq đống. Haq jah bahmàng pì rìm nà Au ma khoi doi ca pì. <sup>27</sup> Au òi loq hlài ca pì can catèm. Can catèm Au ma am ca pì, ùh xài 'màng ca crống taneh ma am. Apa q manhài ta manoh wa apa q yùq crè.

<sup>28</sup> “Pì khoi tàng Au doi ca pì: ‘Au padon loh lam, khoi èh, Au jah tawìh hlài ta pì.’ Tàng pì loq waq ca Au, pì jah bùi lem, ma jah 'màng aih Au hlài ta Baq, Haq càn yi hnao ca Au. <sup>29</sup> Jò cô, Au doi ca pì adroi, waq ca jò leq bìac cô loh èh, pì jah lùì Au. <sup>30</sup> Pàng cô ta èh, Au ùh capoch tùang ca pì bàc hòm, ma jah 'màng aih kiac Satan, haq ma wèq crống taneh cô jah trùh. Haq ùh i ca cwìang cleq enh 'nhèq ca Au. <sup>31</sup> Mahaq, waq ca

mangai crông taneh cô jah loq, Au loq waq ca Baq, Au broq tiaq rìm biac Baq Au ma thê.

“Yòng beq, bèn loh khoi enh nòi cô.”

## 15

### *Xèm Long Nho wa Hamenh Haq*

<sup>1</sup> “Cla Au long nho joq 'nàng wa Baq Au, Haq pìt long nho. <sup>2</sup> I hamenh ỏi ti Au ma ùh i ca plì, Haq coh cađac. Tàng hamenh i plì, Haq cat palaoq hamenh leq ma loh plì, waq ca plì yì bəc tam hòm. <sup>3</sup> Pì khoi jah hliang hreo nhò bàu ma Au khoi anoi hnài pì. <sup>4</sup> Pì phai ỏi enh dalam ca Au tìah ca Au ỏi enh dalam ca pì. Tàng hamenh leq ùh top tiaq long nho, èh cla haq ùh jah loh plì. Tàng pì ùh ỏi enh dalam ca Au, èh hadai ùh jah loh plì.

<sup>5</sup> “Au long nho, pì hamenh ỏi ti long cô. Mangai leq rìh ỏi enh dalam ca Au, Au ỏi enh dalam ca haq, èh haq jah loh plì bəc, ma jah 'màng aih enh gùng ca Au, pì ùh broq cleq ma jah. <sup>6</sup> Tàng mangai ma leq ùh ỏi hloi enh dalam ca Au, èh phai hwenh loh enh gùng, tìah ca hamenh nho talah ca xèm nho, èh haq croh. Wì tagop hlài hwenh đac ta ùnh, èh haq cheo. <sup>7</sup> 'Màng aih, tàng pì ỏi hloi enh dalam ca Au wa bàu Au ỏi hloi ta manoh pì, pì waiq xìn biac cleq pì ma enh, èh jah am ca pì biac aih. <sup>8</sup> Biac ma broq ca Baq Au jah padèch, aih pì loh bəc plì. 'Màng aih jah loq, pì mangai həc tiaq da Au.

<sup>9</sup> “Au khoi loq waq ca pì 'màng ca Baq khoi loq waq ca Au. Phai wèq dađeh ỏi hloi ti can loq waq Au. <sup>10</sup> Tàng pì wèq tiaq bàu thê Au, pì jah

õi hloi ti can loq waq da Au, 'màng ca Au khoi wèq tiaq bàu thê Baq Au, wa Au õi hloi ti can loq waq Haq. <sup>11</sup> Au khoi doi ca pì biac cô, waq ca can lem bùi Au jah õi ta manoh pì, ðòi q can lem bùi pì jah tôm gêh.

### *Ranenh Loq Waq*

<sup>12</sup> “Cô bàu thê Au ma hnài: Pì loq waq ca dabau, 'màng ca Au khoi loq waq ca pì. <sup>13</sup> Ûh i can loq waq leq yi càn hòm, aih can loq waq dèh ca bua ma cađac dèh can rih. <sup>14</sup> Pì bua Au tàng pì hloi hloi broq biac Au ma thê broq. <sup>15</sup> Au ùh creo ca pì hapõng hòm, ma jah 'màng aih hapõng ùh 'nì dèh ca craq haq broq cleq. Mahaq Au creo ca pì bua Au, taiq Au khoi hnài am ca pì rìm biac ma Au khoi tàng Baq Au doi ca Au. <sup>16</sup> Ûh xài pì khoi ràih Au, mahaq cla Au khoi ràih pì thê pì lam broq biac loh plì bàc, waq ca plì aih jah õi hloi hloi. 'Màng aih, ùh kè pì bòch Baq cleq canòm hiniq Au, Haq jah am ca pì. <sup>17</sup> Cô ranenh Au thê: Pì phai loq waq ca dabau.

<sup>18</sup> “Tàng mangai crõng taneh git ca pì, èh pì loq, wì khoi git ca Au adroi ca wì git ca pì. <sup>19</sup> Tàng pì broq tiaq mangai crõng taneh, èh crõng taneh jah loq waq ca pì. Mahaq taiq pì ùh broq tiaq mangai crõng taneh, wa Au khoi ràih pì loh enh con mangai crõng taneh, ma jah mangai crõng taneh git ca pì. <sup>20</sup> Phai hmàng hlài bàu Au ma khoi doi ca pì: ‘Ùh i ca hapõng leq càn yi hnao ca craq Haq.’<sup>☆</sup> Tàng wì khoi ti rùp Au, wì hadai ti rùp pì. Tàng wì khoi iu wèq bàu Au hnài, wì

---

☆ **15:20** 15:20 Jon 13:16.

jah iu wèq bàu pì hadai. <sup>21</sup> Mahaq wì jah broq ca pì biac xa cô taiq hiniq Au, wa hadai taiq wì ùh loq ca Haq ma thê Au trùh ta cô. <sup>22</sup> Tàng Au ùh trùh doi ca wì, èh wì ùh i ca tôiq lôi cleq, mahaq manàiq cô wì pi jah pa'nen ðòiq cadoc dèh tôiq cla. <sup>23</sup> Mangai ma leq git ca Au, hadai git ca Baq Au. <sup>24</sup> Tàng Au ùh broq ôi ta wì biac 'nhòq lah i cabô nui broq, èh wì haq ùh i ca tôiq cleq. Mahaq manàiq cô wì khi hnoq ro, mahaq wì xôq git ca Au wa Baq Au. <sup>25</sup> Mahaq wì broq ðiq ca biac cô ðòiq broq xit bàu ma khi achih ta Ranenh: 'Wì git ca Au ùh i ca nen.'\*

<sup>26</sup> "Mahaq jò Yiang Jùp Ðò khi trùh, Yiang ma Au thê trùh enh Baq, Haq Yiang Bàu Joq 'Nàng trùh enh Baq, cla Haq aih jah anoi hlài biac Au, <sup>27</sup> wa cla pì hadai jah anoi hlài biac Au taiq pì khi ôi ti Au enh jò baxèm."

## 16

### *Biac Yiang Hadròih Broq*

<sup>1</sup> "Au khi doi ca pì ðiq ca biac cô ðòiq pì ùh hiaq catòih cro. <sup>2</sup> Wì jah hnan 'noh ðac pì loh enh gùng ca hnem tagop; jêh caðac pì, mahaq wì xoh ðaðeh patih biac Boc Plinh. <sup>3</sup> Wì broq 'màng aih, taiq wì ùh loq ca Baq wa ùh loq ca Au. <sup>4</sup> Mahaq Au khi doi ca pì biac cô ðòiq trùh jò aih, pì jah hmàng hlài Au khi doi ca pì biac aih. Baxèm Au ùh doi ca pì biac cô taiq Au ôi ôi ta pì. <sup>5</sup> Mahaq manàiq cô Au padon hlài ta Haq ma khi thê Au trùh ta cô. Ôi ta pì, ùh i ca cabô bòch Au: 'Thài lam ta leq?' <sup>6</sup> Mahaq

\* 15:25 15:25 BCP 35:19; 69:4.

taiq Au khoi doi ca pì biac cô, ta manoh pì bình halùih biac mango. <sup>7</sup> Mahaq Au doi ca pì biac joq 'nàng, Au loh lam, aih i lòiq ca pì, ma jah 'màng aih, tàng Au ùh lam khoi ca pì, Yiang Jùp Đò ùh jah trùh ta pì. Mahaq tàng Au lam, Au jah thê Haq trùh ta pì. <sup>8</sup> Jò Haq trùh, Haq jah broq ca wì mangai crông taneh canao loq dèh ca tôiq lôi 'màng leq, loq ca biac ta-atoq 'màng leq, wa loq ca biac hadrah 'màng leq; <sup>9</sup> broq con mangai canao loq dèh ca tôiq lôi taiq wì ùh lùì Au; <sup>10</sup> loq ca biac ta-atoq, taiq Au padon hlài ti Baq Au, pì ùh jah hnoq Au hòm; <sup>11</sup> biac hadrah tôiq, taiq Boc Plinh khoi hadrah baxa haq ma wèq crông taneh cô, aih can kiac Satan.

<sup>12</sup> “Öi i bàc biac Au enh hatùang ca pì, mahaq manàiq cô pì 'nhòq i padren tàu nhàn yõc. <sup>13</sup> Mahaq jò Yiang Hadròih, aih Bàu Joq 'Nàng trùh ta pì, Haq jah mahno ca pì loq tôm gèh bàu joq 'nàng. Ma jah 'màng aih Haq anoi ùh tiaq dèh manoh, mahaq Haq capoch bàu Haq tàng, èh anoi hlài ca pì biac jah loh atiq cô èh. <sup>14</sup> Haq jah padèch ha'nhèq Au, ma jah 'màng aih Haq nhàn biac enh Au, anoi hlài ca pì. <sup>15</sup> Dìq biac Baq khoi i, aih biac Au. Ma jah Au doi ca pì, Yiang Hadròih, Haq jah yõc biac enh Au wa anoi hlài ca pì.

### *Jò Mango wa Jò Bùì*

<sup>16</sup> “Öi toq 'biaq hòm, pì ùh jah hnoq Au, mahaq gòm toq 'biaq hòm, pì jah hnoq Au.”

<sup>17</sup> 'Màng aih, i wì öi ta mangai hõc tiaq Haq bòch dabau: “Haq capoch bàu cleq jò Haq doi: Toq 'biaq jò, pì ùh jah hnoq Au. Gòm toq 'biaq

jò hòm, pì jah hnoq Au; wa bàu: Au hlài dèh ta Baq. Aih 'màng leq?" <sup>18</sup> 'Màng aih, mangai hóc tiaq òi bòch dabau: "Haq doi: Gòm toq 'biaq jò, aih 'màng leq? Bèn ùh 'nì tàng Haq anoi biác cleq."

<sup>19</sup> Chuaq Jêxu khoi loq manoh wì enh bòch Haq. Haq doi ca wì: "Pì khoi bòch dabau: Bàu ma Au doi ca pì: Toq 'biaq jò, pì ùh jah hnoq Au; gòm toq 'biaq jò hòm, pì jah hnoq Au; bàu aih doi cleq, joq ùh?" <sup>20</sup> Joq 'nàng, Au doi ca pì: Pì jah hmoi, crò ta-oih, mahaq mangai crống tanèh jah lem bùi. Pì jah mango, mahaq mango da pì jah wìh wìa lem bùi. <sup>21</sup> Jò gu cadrì padon xa-ông, haq jìq xa, mahaq jò haq khoi jah xa-ông con, haq ùh hmàng biác jìq xa hòm, taiq haq bùi lem khoi xa-ông con loh ta crống tanèh. <sup>22</sup> 'Màng cô, pì hadai loq mango manàiq cô, mahaq Au jah hnoq pì mòi q yàng hòm. Jò aih pì jah bùi lem. ùh i ca mangai leq jah bahnhung đac biác bùi lem da pì. <sup>23</sup> Hì aih pì ùh òi bòch Au biác cleq hòm. Joq 'nàng, Au doi ca pì: Biác cleq pì ma canòm ca hiniq Au waiq xìn Baq, Haq am ca pì. <sup>24</sup> Trùh manàiq cô, pì ùh lah canòm hiniq Au bòch biác cleq. Manàiq cô bòch beq, pì jah nhàn yóc waq ca biác can bùi lem da pì jah gêh tòm.

<sup>25</sup> "Au khoi capoch bàu aliah doi ca pì biác cô. Manàiq ten trùh jò Au ùh capoch bàu aliah hòm, mahaq Au jah anoi hlài ro biác Baq am ca pì. <sup>26</sup> Hì aih pì jah canòm hiniq Au, waiq khàn. Au ùh doi: Au ep bòch Baq thai ca pì, <sup>27</sup> taiq Baq loq waq ca pì taiq pì khoi loq waq ca Au wa pì khoi lùì Au khoi loh enh Boc Plình. <sup>28</sup> Au khoi loh

enh Baq trùh ta crõng taneh. Manàiq Au cađac crõng taneh hlài ti Baq.”

<sup>29</sup> Wì mangai hõc tiaq Haq doi: “Manàiq cô Ìh khoi capoch ro rang, ùh capoch bàu aliah hòm.

<sup>30</sup> Manàiq cô nhèn loq, Thài loq òiq ðõng rìm hiniq. Ùh nhet ca i mangai leq bòch Ìh hòm, taiq nen aih nhèn lùì Ìh joq 'nàng loh enh Boc Plình.”

<sup>31</sup> Chuaq Jêxu doi: “Manàiq cô pì lùì ùh? <sup>32</sup> Ten trùh jò, joq 'nàng khoi trùh, pì cadàu tac mac mòiq ngai mòiq trong. Pì ðòiq Au òi ðeh mòiq Ngai, mahaq Au ùh òi mòiq Ngai taiq i Baq òi ti Au.

<sup>33</sup> “Au khoi doi ca pì bìac cô waq ca pì jah òi catèm ti Au. Òi crõng taneh pì ep chiùq bìac nan xa, mahaq pì phai cajap manoh, ma jah 'màng aih Au khoi 'blêq ca crõng taneh.”

## 17

### *Bàu Waiq Khàn da Chuaq Jêxu*

<sup>1</sup> Jò Chuaq Jêxu hêq ca doi bàu aih, Haq ngoi ngan ta plình waiq khàn:

“Baq ôi, khoi trùh jò xìn Ìh broq ca Con jah 'ngah 'ngai waq ca Con hadai broq ca Baq jah 'ngah 'ngai.

<sup>2</sup> “ 'Màng ca Ìh khoi am ca Con cwìang itai enh 'nhèq ca mangai òiq ðõng, Con am ca wì can rìh hloi hloi, aih mangai Baq ma khoi jao am ca Con. <sup>3</sup> Can rìh hloi hloi, aih canao loq ca Baq, Boc Plình joq 'nàng, wa Chuaq Jêxu Crìch ma Ìh khoi thê trùh. <sup>4</sup> Au khoi broq 'ngah 'ngai



hiniq Ìh ỏi crống taneh. Au khoi broq òi bìa  
 ma Ìh khoi jao ca Au broq. <sup>5</sup> Manàiq cô, xìn  
 Baq broq Au jah 'ngah 'ngai lem linh enh ngia  
 ca Baq, aih 'ngah 'ngai lem linh ma Au i pajùm  
 ca Ìh adroi ca jò broq plình crống taneh.

<sup>6</sup> “Au khoi pa'noh hiniq Ìh am ca wì Ìh ma  
 khoi am ca Au enh crống taneh. Wì haq  
 mangai da Ìh, èh Ìh khoi am wì ca Au. Wì  
 khoi iu wèq bàu Ìh. <sup>7</sup> Manàiq cô wì loq rìm  
 bìa ma Ìh khoi am ca Au, òi òi trùh enh  
 Ìh. <sup>8</sup> Ma jah 'màng aih bàu ma Ìh khoi doi ca  
 Au, Au doi ca wì. Wì iu bàu cô wa wì loq Au  
 trùh enh Ìh, wa lúi Ìh khoi thê Au trùh ta cô.  
<sup>9</sup> Au waiq khàn am ca wì. Au ùh waiq khàn am  
 ca mangai crống taneh, mahaq waiq khàn am  
 ca wì ma Ìh khoi am ca Au, ma jah 'màng aih  
 wì mangai da Ìh. <sup>10</sup> Rìm bìa Au ma i, aih bìa  
 da Baq, wa òi òi bìa cleq da Baq, hadai  
 aih da Au. Au jah 'ngah 'ngai lem linh nhò wì  
 haq. <sup>11</sup> Manàiq Au ùh ỏi ta crống taneh hòm,  
 mahaq wì haq xôq ỏi ta crống taneh. Au hlài  
 ta Ìh. Waiq Baq Hadròih, xìn wèq ban wì ỏi ta  
 hiniq Ìh, hiniq ma Ìh khoi am ca Au, waq ca  
 wì broq mòiq manoh 'màng ca Ba xôq mòiq  
 manoh. <sup>12</sup> Jò Au ỏi ta wì, Au khoi wèq ban wì  
 ma Ìh khoi am ca Au ỏi ta hiniq Ìh. Au khoi  
 wèq ban wì haq òi òi ùh hnhung mòiq ngai,  
 enh gùng ca mangai ma jah creo con da bìa  
 raliang cađac, tiaq bàu ma khoi achih ta Sech  
 Hadròih jah xit.

13 “Manàiq cô Au hlài ta Ìh. Jò Au ỏi ta crống taneh, Au doi dìq ca bìac cô waq ca can bùi lem da Au jah ùc bình ta manoh wì. 14 Au khoi doi ca wì bàu Ìh. Crống taneh khoi git ca wì taiq wì ùh broq mangai crống taneh tìah ca Con hadai ùh broq Mangai da crống taneh. 15 Au ùh waiq xin Baq yóc 'noh wì khoi enh crống taneh, mahaq xin Ìh wèq ban wì khoi ca can kiac dù. 16 Wì haq ùh broq mòiq manoh ca mangai crống taneh, 'màng ca Au ùh broq mòiq manoh ca mangai crống taneh. 17 Xin Ìh yóc bàu joq 'nàng broq wì wìa mangai hadròih. Bàu Ìh aih bàu joq 'nàng. 18 Ìh khoi thê Au trùh crống taneh 'màng leq, Au hadai thê wì lam ta crống taneh. 19 Taiq wì ma Au broq hadròih dađeh, waq ca wì hadai jah wìa hadròih nhò bàu joq 'nàng.

20 “Au ùh xài toq waiq khàn am ca wì, mahaq Au waiq khàn am dìq đống mangai ma lùì Au nhò bàu anoi hnài wì haq. 21 Waq ca wì dìq đống broq mòiq, 'màng ca Baq ỏi enh dalam ca Au, Au ỏi enh dalam ca Baq. 'Màng aih wì hadai broq mòiq ỏi ta Ba waq ca crống taneh jah lùì Ìh khoi thê Au trùh ta cô. 22 'Màng ca Au khoi am ca wì haq 'ngah 'ngai lem linh Ìh ma khoi am ca Au, waq ca wì jah broq mòiq, hadai broq mòiq tìah ca Ba. 23 Au ỏi enh dalam ca wì haq, wa Ìh ỏi enh dalam ca Au, waq ca wì jah broq mòiq dìq ca manoh. 'Màng aih mangai crống taneh jah loq Ìh khoi thê Au trùh, wa loq Ìh loq waq ca wì 'màng ca Ìh loq waq ca

Au.

<sup>24</sup> “Ôi Baq! Wì mangai ma Ìh khi am ca Au, Au enh waq wì òi ti Au. Au òi ti leq, wì hadai òi ti aih, waq ca wì hnoq 'ngah 'ngai lem linh da Au Ìh ma khi am ca Au, ma jah 'màng aih Ìh khi loq waq ca Con adroi ca jò broq loh crống taneh.

<sup>25</sup> “Ôi Baq ta-atoq, 'nhac ca wì crống taneh ùh loq ca Ìh, mahaq Au loq ca Ìh, wa 'bài mangai cô loq cla Ìh ma thê Au trùh ta cô. <sup>26</sup> Au khi patô am ca wì loq hiniq Ìh, wa Au òi patô am ca wì loq hiniq Ìh tam hòm, waq ca can loq waq ma Ìh am ca Au, jah òi ta manoh wì, wa Au hadai òi enh dalam ca wì haq.”

## 18

*Wì Rùp Chuaq Jêxu ta Wùan Ghêt-sê-ma-nê  
(Mat 26:47-56; Mòc 14:43-50; Luc 22:47-53)*

<sup>1</sup> Chuaq Jêxu waiq khàn khi gêh, Haq loh enh gùng pajùm dèh ca wì mangai hóc tiaq, lam cwa diac con Kitrôn. I wùan òi ti aih. Haq mùt ta wùan pajùm dèh ca mangai hóc tiaq.

<sup>2</sup> Juda, mangai ma blòq Chuaq Jêxu, loq ca wùan cô, ma jah 'màng aih Chuaq Jêxu wa mangai hóc tiaq Haq khi lam ti aih bacc yàng.

<sup>3</sup> Juda 'ràng jèn 'bài linh wa mangai rap ma wì pajàu càn wa mangai Pha-ri-si thê lam tiaq haq, mùt ta wùan. Wì haq wê hadrêu wa ranac tajêh.

<sup>4</sup> Chuaq Jêxu loq diq dồng ca biac ma padon trùh ca Haq. Haq loh ðih wì, bòch: “Pì chaq bô?”

<sup>5</sup> Wì tèo Haq: “Chaq Chuaq Jêxu, Mangai Na-xa-ret.”

Chuaq Jêxu doi: “Cô, Au cô.” Juda mangai ma blòq Chuaq Jêxu, yòng pajùm ca wì.

<sup>6</sup> Jò Chuaq Jêxu doi: “Cô Au”, wì talùi ratàc cloh ta taneh.

<sup>7</sup> Khoi èh, Chuaq Jêxu bòch wì mòiç yàng hòm. “Pì chaq cabô?”

Wì doi: “Chuaq Jêxu Mangai Na-xa-ret.”

<sup>8</sup> Chuaq Jêxu padreo hlài bàu: “Au khoi doi ca pì: Cô Au. Mahaq tàng pì joq 'nàng chaq rùp Au, pì phai ca'naih 'bài mangai cô lam.” <sup>9</sup> Bìac cô loh xit troi bàu Chuaq Jêxu khoi doi ìç: “Ta 'bài wì ma ìh khoi am ca Au, Au ùh hnhung mòiç ngai leq.”✧

<sup>10</sup> Simôn Pêtrô i chang. Haq dôiç chang jêh hapõng da pajàu ha'nhèq, pốt don haq pah 'ma. Hiniq hapõng aih Manchu.

<sup>11</sup> 'Màng cô, Chuaq Jêxu doi ca Pêtrô: “Đòiq hlài chang mùt ta hnup beq! Doi chrõng ma Baq Au khoi am Au ôq, gleq ma jah Au ùh ôq?”

### *Chuaq Jêxu Enh Ngìa ca Anne wa Caiphe*

<sup>12</sup> Atìq ca aih, đòiq lình wa wì mangai rap enh wì mangai Yothaiq ma broq gàu, rùp Chuaq Jêxu hi cật Haq. <sup>13</sup> Wì 'ràng Haq trùh ti Anne adroi, ma jah 'màng aih Anne, baq mai Caiphe ma broq pajàu ha'nhèq hanam cô. <sup>14</sup> Caiphe cô raq haq mangai ma khoi doi ca mangai Yothaiq ma broq gàu: “Tàng mòiç ngai cachit thai ca wì òiq òng, cô lem.”

---

✧ **18:9** 18:9 Jon 6:39.

*Pêtrô Hangah Chuaq  
(Mat 26:69-70; Mõc 14:66-68; Luc 22:55-57)*

<sup>15</sup> Simôn Pêtrô pajùm ca mòiq ngai mangai hõc tiaq ma 'noiç lam tiaq Chuaq Jêxu. Pajàu ha'nhèq canao mangai hõc tiaq ma 'noiç aih, 'màng cô haq jah mùt ta xàn hnem pajàu ha'nhèq pajùm ca Chuaq Jêxu. <sup>16</sup> Mahaq Pêtrô yòng enh gùng ca 'mang ngo. Mangai hõc tiaq ma canao loq ca pajàu ha'nhèq tau, haq loh enh gùng, doi ca gu cadrì ma gòm 'mang ngo, hi khoi 'ràng Pêtrô mùt.

<sup>17</sup> Khoi èh, gu cadrì ma gòm wèq 'mang doi ca Pêtrô: “Ìh hadai mangai hõc tiaq Mangai meh, joq ùh?”

Pêtrô doi: “Ùh, au ùh xài.”

<sup>18</sup> Manàiq cô wì mangai hapõng wa 'bài mangai rap, khoi hlôi ùnh wa wì yòng 'nhìa ùnh taiq tanget. Pêtrô õi ti wì xôq yòng 'nhìa ùnh.

<sup>19</sup> Pajàu ha'nhèq bòch Chuaq Jêxu biac mangai hõc tiaq Haq 'màng leq, wa biac Haq ma hnài 'màng leq.

<sup>20</sup> Chuaq Jêxu padreo hlài bàu doi: “Au khoi doi ro ca wì õi ta crõng taneh. Au khoi hnài yõt wì õi ta hnem tagop, loq õi ta Hnem Cùh Waiç, aih nòi mangai Yothaiç tagop dìq dõng. Au ùh lah cadoc biac cleq. <sup>21</sup> Gleq ma bòch Au? Bòch wì ma khoi tàng biac Au khoi doi ca wì beq. Wì loq ca biac ma Au khoi hnài.”

<sup>22</sup> Jò Haq doi 'màng cô, i mòiq ngai rap ma yòng ti aih, tep Chuaq Jêxu, haq doi: “Ìh hùa tèo hlài ca pajàu ha'nhèq 'màng aih 'mòh?”

<sup>23</sup> Chuaq Jêxu doi: “Tàng Au capoch ùh troq, ìh phai anoi hlài bàu ma leq ma ùh troq. Mahaq tàng Au capoch troq, gleq ìh ma tep Au?” <sup>24</sup> Khoi èh Anne thê wì 'ràng Haq, xôq òi càt, trùh ta hnem pajàu ha'nhèq Caiphe.

<sup>25</sup> Jò aih Simôn Pêtrô xôq òi yòng 'nhìa ùnh. Wì bòch haq: “Ìh hadai broq mangai hóc tiaq Haq ajoq?”

Mahaq Pêtrô hangah doi: “Ùh, au ùh xài.”

<sup>26</sup> Mòi q ngai hapõng pajàu ha'nhèq, oh daq ca mangai ma Pêtrô khoi pốt don haq, doi: “Au khoi hnoq ìh òi pajùm ca Haq òi ta wùan, joq ùh?”

<sup>27</sup> Mòi q yàng hòm, Pêtrô hangah doi: “Ùh!” Tajòi 'mòi ia rõng.

*Chuaq Jêxu Enh Ngìa ca Philat*

*(Mat 27:1-2,11-31; Mõc 15:1-20; Luc 23:1-5,13-25)*

<sup>28</sup> Khoi èh wì 'ràng Chuaq Jêxu loh enh hnem Caiphe mùt Adùq Hadràh Rôma ta hnem tình trùang. Manàiq òi raq xroih xroq. Wì ùh hùa mùt ta hnem yùq broq ùh hadròih ca dađeh, èh ùh jah caq Lè Lam Cwa. <sup>29</sup> 'Màng aih, Philat loh ãđìh wì enh gùng. Haq bòch: “Pì kian Mangai cô bìac cleq?”

<sup>30</sup> Wì tèo: “Tàng Haq ùh broq dù, nhèn ùh 'ràng Haq am ca ìh.”

<sup>31</sup> Philat doi ca wì: “Pì 'ràng Haq hlài. Pì hadrah haq tiaq ranenh pì beq!”

Wì mangai Yothaiq tèo haq, doi: “Nhèn ùh i cwìang hadrah ãđìq jêh đac mangai.”

<sup>32</sup> Biac cô khoi trùh òiđi broq xit troi bàu Chuaq Jêxu khoi doi adroi, Haq phai cachit 'màng leq.

<sup>33</sup> Philat mùt hlài ta Adùq Hadrah, bòch Chuaq Jêxu: “Ìh Bùa mangai Yothaiq ajoq?”

<sup>34</sup> Chuaq Jêxu tèo haq: “Ìh capoch tiaq dèh manoh, loq khoi i mangai leq anoi biac Au ca ìh?”

<sup>35</sup> Philat doi: “Au mangai Yothaiq 'mòh? Con jàn Ìh wa pajàu càn khoi 'ràng Ìh trùh jao ti au. Ìh khoi broq cleq?”

<sup>36</sup> Chuaq Jêxu tèo: “Diac Au Broq bùa ùh xài loh enh con mangai òi ta Diac crõng taneh cô. Tàng Diac Au Broq bùa loh enh con mangai crõng taneh, 'màng cô hapõng Au jah tabroq tajêh wèq Au, ùh am Au ca wì mangai Yothaiq. Mahaq Diac Au Broq bùa ùh xài loh enh con mangai crõng taneh cô.”

<sup>37</sup> Philat doi ca haq: “'Màng aih Ìh broq Bùa 'mòh?”

Chuaq Jêxu tèo: “Joj 'nàng Au broq Bùa, 'màng ca ìh khoi doi. Au khoi xa-ông wa khoi trùh ta crõng taneh waq ca Au jah anoi hlài bàu joq 'nàng. Mangai ma leq tiaq bàu joq 'nàng haq loq tàng bàu Au.”

<sup>38</sup> Philat bòch Haq: “Bàu joq 'nàng, aih cacleq?” Khoi ca doi bàu cô, Philat loh enh gùng, doi ca wì mangai Yothaiq: “Au chaq ùh hnoq tôiq lôl cleq òi ta Haq. <sup>39</sup> Mahaq tiaq troi ranenh pì ma khoi canao broq dèh enh adroi, ta'nàih ca hì caq Lè Lam Cwa èh, au ca'naih mòiq ngai,

mangai tù. Pì enh au ca'naih Bùa Mangai Yothaiq am ca pì ùh?”

<sup>40</sup> Wì diq dǒng creó bàu dēh: “Ùh, apaq ca'naih Haq, mahaq ca'naih 'Ba-ra-ba!” 'Ba-ra-ba cô, haq mangai atùng.

## 19

### *Wì Mangai Linh Lê Baxa Chuaq Jêxu*

<sup>1</sup> Hi khoi, Philat thê wì 'nong Chuaq Jêxu lam wa blai Haq. <sup>2</sup> Wì mangai linh broq cadoh xam hila pacô i ca Haq ti gàu, am ca Haq caxùnh eo ma gòh drinh. <sup>3</sup> Wì trùh ti Haq capoch lê, doi: “Waiq Bùa mangai Yothaiq.” Khoi ca aih wì tep hadrô Haq.

<sup>4</sup> Khoi èh, Philat loh enh gùng mòi q yàng hòm, doi ca wì: “Ngan cô, au 'ràng Haq loh enh ngìa ca pì, waq ca pì loq au chaq ùh hnoq tôiq lô i cleq ôi ti Haq.” <sup>5</sup> Chuaq Jêxu cadiang loh; gàu cô i cadoh broq xam hila; chac Haq caxùnh eo ma gòh drinh. Philat doi ca wì: “Ngan Mangai cô!”

<sup>6</sup> Jò wì pajàu càn wa 'bài mangai rap hnoq Haq, wì creó bàu dēh: “Tiang ðinh Haq ta long pagat beq! Tiang ðinh Haq ta long pagat beq!”

Philat doi: “Pì tiang ðinh Haq beq! Au chaq ùh i tôiq lô i cleq ôi ti Haq.”

<sup>7</sup> Mangai Yothaiq tèò: “Nhèn i ranenh, tiaq ranenh cô Haq phai cachit taiq Haq doi, Haq Con Calô Boc Plinh.”

<sup>8</sup> Jò Philat tàng bàu cô, haq yi yùq crè tam hòm.

<sup>9</sup> Haq mùt hlài ta Adùq Hadrah, bòch Chuaq Jêxu: “Ìh trùh enh leq?” Mahaq Chuaq Jêxu ùh



tèo haq. <sup>10</sup> Philat bòch hòm: “Gleq ìh ùh doi ca au bàu cleq? ìh ùh 'nì au i cwìang ca'naih ìh wa i cwìang tiang ònh ìh 'mòh?”

<sup>11</sup> Chuaq Jêxu padreo hlài bàu: “Ìh toq i cwìang enh 'nhèq ca Au tàng Boc Plình am ca ìh cwìang aih. 'Màng aih, mangai ma khoi 'ràng Au am ca ìh, haq aih i tôiq yi càn.”

<sup>12</sup> Enh jò aih, Philat chaq trong òoiq ca'naih Haq, mahaq wì mangai Yothaiq creò bàu dèh doi: “Tàng ìh ca'naih Mangai cô, ìh ùh xài bua da Sêsa. Mangai leq ma doi dađeh broq bùa, èh mangai aih enh ta'blêq ca Sêsa.”

<sup>13</sup> Jò Philat tàng bàu cô, haq 'ràng Chuaq Jêxu loh enh gùng. Haq ha'ngui ta gèq hadrah wì creò, Nòi Xap Hmu, bàu Yothaiq doi, Ga-ba-tha.

<sup>14</sup> Manàiq Hì Padon Caq Lè Lam Cwa trùh ten 12 jò.

Philat doi ca wì mangai Yothaiq: “Cô Bùa pì.”

<sup>15</sup> Mahaq wì creò bàu dèh doi: “Jêh cađac Haq! Jêh cađac Haq! Tiang ònh Haq ta long pagat.”

Philat doi ca wì: “Au tiang ònh Bùa pì ta long pagat 'mòh?”

Wì pajàu càn padreo hlài bàu: “Enh gùng ca Sêsa, nhèn ùh i ca bùa.”

<sup>16</sup> Khoi èh, haq am ca wì Chuaq Jêxu waq ca wì tiang ònh Haq.

### *Chuaq Jêxu 'Bìq Wì Tiang Ònh*

*(Mat 27:32-56; Mỗc 15:21-41; Luc 23:26-49)*

Wì rùp Chuaq Jêxu hì 'nong Haq lam. <sup>17</sup> Haq xùì dèh long pagat trùh ta nòi Cadôh, bàu Yothaiq doi, Gô-gô-tha. <sup>18</sup> Wì tiang ònh Haq ti aih. I baiq ngai ma 'noi q hòm hadai 'bìq tiang

đình troi Haq, mòiq ngai mòiq apah, Chuaq Jêxu òi ta'ne.

<sup>19</sup> Philat thê wì broq mòiq capiac long ban atua nòi long pagat Haq. Ta long ban aih, achìh 'màng cô: Chuaq Jêxu Mangai Na-xa-ret, Haq Bùa Mangai Yothaiq. <sup>20</sup> I bàc Ngai Yothaiq jah đóc bàu cô, ma jah 'màng aih nòi ma wì tiang đình Chuaq Jêxu haten ca phôq. Khoi achìh chù cô xam bàu Yothaiq, bàu Rôma, bàu Hilap. <sup>21</sup> Wì pajàu càn Yothaiq doi ca Philat: “Apaq achìh: ‘Bùa Diac Yothaiq,’ mahaq phai achìh: Haq doi: Au broq Bùa jàn Yothaiq.”

<sup>22</sup> Philat tèo: “Bìac ma au khoi achìh, òiđiq 'màng 'mat raq.”

<sup>23</sup> Jò wì mangai linh khoi tiang đình Chuaq Jêxu, wì yóc eo Haq, axong pôn phàn, mòiq ngai mòiq phàn, mahaq eo yôh ùh i ca trong jìp, khoi jah tenh enh 'nhèq trùh ta 'neq.

<sup>24</sup> 'Màng aih, wì doi: “Apaq hich eo cô. Bèn pàih panàih beq, loq jah cabô.”

Wì khoi broq biac cô òiđiq xít ca Bàu Sech Hadròih khoi achìh:

“Wì axong eo Au,

wa pàih panàih waq ca loq eo yôh Au jah cabô.”<sup>✧</sup>

Wì mangai linh khoi broq troq bìac cô.

<sup>25</sup> Mahaq i miq Chuaq Jêxu wa daq miq, aih Mari mai Clôpa, wa Mari Ma-đò-len, wì yòng haten ca long pagat Chuaq Jêxu. <sup>26</sup> Jò Chuaq Jêxu hnoq miq Haq wa mangai hóc tiaq cô ma Chuaq loq waq ca haq, Haq doi ca miq Haq: “Miq ôi, haq con ìh.” <sup>27</sup> Hi khoi, Haq doi ca mangai hóc

<sup>✧</sup> **19:24** 19:24 BCP 22:18.

tiaq aih: “Cô miq ìh.” Pàng aih, mangai hóc tiaq cô 'ràng miq Chuaq Jêxu ahlài dèh ta hnem wèq haq.

<sup>28</sup> Khoi èh, Chuaq Jêxu khoi loq rìm biac dìq dǒng khoi broq gêh ðòiq jah xit troi bàu ma khoi achìh ta Sech Hadròih, Haq doi: “Au croh ranǒng.” <sup>29</sup> Jang aih i mòiq toq padrì ùc bình diac jòq. Wì yǒc mòiq cato yù dayan chùq ta diac jòq, càt ta hamenh long xôn, dèch ahacùng Haq. <sup>30</sup> Jò Chuaq Jêxu khoi ôq diac jòq cô, Haq doi: “Dìq ca hiniq khoi gêh!” Khoi ca aih, Haq cùp gàu, hi 'noh dèh mahua yang.

<sup>31</sup> Hì aih Hì Padon Caq Lè Lam Cwa. Wì mangai ma wèq cwìang mangai Yothaiq, ùh enh ðòiq hanang ǒi ta long pagat ta hì Sabat taiq hì aih hì cà. 'Màng aih wì xin Philat am ca wì tong tagoh caxènh tangon wì ðòiq 'noh hanang loh ha'neq. <sup>32</sup> Wì mangai lình trùh ti mangai baxèm, wì tong tagoh caxènh tangon haq, wa mangai 'noiq hadai ma wì khoi tiang ðinh adrình ca Chuaq Jêxu. <sup>33</sup> Mahaq jò wì trùh jang Chuaq Jêxu, wì hnoq Haq khoi cachit. Wì ùh broq tagoh caxènh tangon Haq. <sup>34</sup> Mahaq i mòiq ngai lình yǒc jaoq bìt caxènh himìa Haq. Tajòì 'mòì i mahem wa diac loh. <sup>35</sup> Mangai ma hnoq biac cô anoi hlài bàu cô. Bàu cô joq 'nàng, wa mangai aih loq ca dađeh capoch joq 'nàng waq ca pì hadai lùì. <sup>36</sup> Biac cô, aih broq xit troi bàu ma Sech Hadròih khoi achìh: “Ùh i mòiq toq caxènh leq da Haq jah tagoh.”<sup>☆</sup> <sup>37</sup> I brong ma 'noiq ǒi ta Sech Hadròih

☆ 19:36 19:36 LEA 12:46; SJ 9:12; BCP 34:20.

khôi achìh: “Wì jah ngan Mangai wì ma khôi bìt.”☆

*Bìac Catùh Chuaq Jêxu*

*(Mat 27:57–61; Mõc 15:42–47; Luc 23:50–56)*

<sup>38</sup> Khôi èh, i Jôsep mangai òi plài A-ri-ma-thê, aih mangai hõc tiaq Chuaq Jêxu, mahaq haq tiaq ðeh hlèp taiq Haq yùq crè ca mangai Yothaiq. Haq bòch Philat xìn yõc 'ràng hanang Chuaq Jêxu. Philat am. 'Màng cô haq lam yõc hanang Chuaq Jêxu, <sup>39</sup> wa i Ni-cô-ðem, mangai jò aih nèh i trùh ta Chuaq Jêxu damang, hadai lam tiaq Jôsep. Haq 'ràng jah 34 kìq mùc jùac wa gahnàu. <sup>40</sup> 'Màng cô wa 'noh hanang Chuaq Jêxu, wa yõc bai habùac wa dahwèq xua thùm caxop hanang Haq tiaq ranenh catùh hanang mangai Yothaiq. <sup>41</sup> Nòi ma wì tiang ðinh Haq i wàan. Ta cô i còp hmu broq ralùng neo 'nhòq lah ðòi q cabô. <sup>42</sup> 'Màng cô, taiq ten trùh hì Lè Lam Cwa da mangai Yothaiq, wa ralùng còp hmu haten ti aih, wì 'mùt prôih hanang Chuaq Jêxu ta aih.

## 20

*Chuaq Jêxu Rìh Hlài*

*(Mat 28:1–10,16–20; Mõc 16:1–11,14–18; Luc 24:1–12,36–49)*

<sup>1</sup> Hì gàu tùang, plình òi clam, Mari Ma-ðò-len lam trùh ti còp hmu. Haq hnoq hmu ma broq 'mang khôi cadro ta kenh. <sup>2</sup> Haq cadàu lam trùh ti Simôn Pêtrô wa mangai hõc tiaq ma 'noi q, aih mangai ma Chuaq Jêxu loq waq. Haq doi: “Wì

☆ **19:37** 19:37 Xach 12:10.

khôi 'nong hanang Chuaq loh khôi enh còp hmu, ùh 'nì wì ðòiq Haq ta leq."

<sup>3</sup> Khôi ca tàng bàu cô, Pêtrô wa mangai hóc tiaq ma 'noiç loh lam ti còp hmu. <sup>4</sup> Wa baiç ngai cadàu, mangai hóc tiaq ma 'noiç cô cadàu yi renh trùh ta còp hmu adroi. <sup>5</sup> Haq cùp ngan hnoç toç bai habùac caxop ta nòi ma ðòiq hanang Chuaq Jêxu, mahaq haq ùh mùt. <sup>6</sup> Khôi èh, Simôn Pêtrô trùh atiq mùt ta còp hmu, hnoç bai habùac caxop ta nòi ma ðòiq hanang Haq. <sup>7</sup> Mù côi gàu Haq, ùh òi ti bai habùac caxop hanang, mahaq khôi canua ðòiq ta nòi ma crài. <sup>8</sup> Khôi èh mangai hóc tiaq ma trùh ta còp hmu adroi ca haq hadai mùt, haq hnoç, haq lùì. <sup>9</sup> Ma jah 'màng aih wa 'nhòç loç tàng bàu Sech Hadròih khôi achìh: Chuaq Jêxu phai enh mangai cachìt rìh hlài. <sup>10</sup> Khôi èh, wa mangai hóc tiaq hlài dèh ta hnem.

<sup>11</sup> Mahaq Mari gòm enh gùng ca còp hmu, haq hmoi. Haq rai hmoi, rai cùp ngan trom còp hmu. <sup>12</sup> Haq hnoç baiç 'bình plình caxùnh eo taboc ðang ha'ngui jang nòi wì ma ðòiq hanang Chuaq Jêxu, mòiq ha'ngui pah gàu, mòiq ha'ngui pah jèh.

<sup>13</sup> Wa 'bình plình bòch haq: "Ê daç cadrì, gleç ìh ma hmoi?"

Haq doi ca wa: "Wì khôi 'nong Chuaq au ta nòi 'noiç, ùh 'nì wì ðòiq Haq ta leq." <sup>14</sup> Anoi bu khôi, haq wìh hlài hnoç Chuaq Jêxu yòng ti aih, mahaq haq ùh 'nì Haq aih Chuaq Jêxu.

<sup>15</sup> Chuaq Jêxu doi ca haq: Òi daç cadrì: "Gleç ìh ma hmoi? Ìh chaç bô?"

Haq xoh ðeh aih mangai broq wùn, haq doi: “Òi daq, tàng ìh khai 'nong Haq loh khai nòi cô, xìn doi ca au ìh khai ðoìq Haq òi ti leq, au jah 'ràng ahlài Haq.”

<sup>16</sup> Chuaq Jêxu doi ca haq: “Mari!” Mari wìh hlài, haq doi ðêh xam bàu Yothaiq: “Ra-bô-ni!”, aih i hiniq Thài.

<sup>17</sup> Chuaq Jêxu doi ca haq: “Apaq rùp pajràng Au, ma jah 'màng aih Au 'nhòq tồc ta Baq! Mahaq lam beq, doi ca oh daq Au: ‘Au padon tồc ta Baq Au, aih Baq pì; tồc ta Boc Pình Au, aih Boc Pình pì.’ ”

<sup>18</sup> Mari Ma-ðò-len loh lam, anoi ca wì mangai hỏc tiaq: “Au khai hnoq Chuaq!” Haq ta'mon hlài ca wì bìac Chuaq ma khai doi ca haq.

### *Chuaq Mahno Daðeh ca Mangai Hỏc Tiaq*

<sup>19</sup> Jò chiù, hì gàu tùang aih, 'bài mangai hỏc tiaq 'nang tagop òi ta hnem. Wì clenh cajap ðồng ðìq 'mang taiq wì crè ca mangai Yothaiq. Chuaq Jêxu trùh ta wì, yòng ta'ne, doi: “Catèm am ca pì.” <sup>20</sup> Khai ca doi bàu cô, Haq am ca wì hnoq òi Haq wa himìa Haq. Wì mangai hỏc tiaq manè ðìq ca jaq taiq wì hnoq Chuaq.

<sup>21</sup> Chuaq Jêxu doi ca wì mòiq yàng hòm: “Catèm am ca pì. 'Màng ca Baq khai thê Au lam trùh, 'màng aih Au hadai thê pì lam.” <sup>22</sup> Rai doi bàu cô, Haq rai hlôi 'mùt hòi ðêh ca 'bài mangai hỏc tiaq, rai doi: “Pì phai yỏc nhàn Yiang Hadròih beq! <sup>23</sup> Mangai leq ma pì baxống tôiq lôi am ca haq, tôiq lôi haq jah baxống. Mangai leq pì ma ùh baxống tôiq lôi da haq, tôiq lôi haq òi hlài.”

<sup>24</sup> Mahaq jò Chuaq Jêxu trùh, Thôma (hadai i hiniq Con Camia), hanoh mòiq ngai òi ta 12 ngai, mangai hõc tiaq, ùh i òi jang aih. <sup>25</sup> Wì mangai hõc tiaq ma 'noiq doi ca haq: “Nhèn khoi hnoq Chuaq!”

Mahaq haq doi ca wì: “Tàng au ùh hnoq habau ðinh ta tì Haq, ùh bèq nòi habau ðinh aih ta capiang tì, wa ùh bèq nòi habau jang caxèh himìa Haq, au ùh lùì!”

<sup>26</sup> Khoi ca aih rahem hì, wì mangai hõc tiaq tagop ca dabau òi ta hnem, wa i Thôma òi tì wì. Dìq ca 'mang khoi clenh ðõng ðìq, mahaq Chuaq Jêxu trùh yòng ta'ne ca mangai hõc tiaq, doi: “Catèm am ca pì!” <sup>27</sup> Chuaq Jêxu doi ca Thôma 'màng cô: “Dèch tì ìh bèq jang cô, wa ngan capiang tì Au cô, khoi èh dèch capiang tì ìh bèq jang himìa Au beq. Apa q cadoq manoh mahaq phai lùì Au.”

<sup>28</sup> Thôma doi ca Haq: “Waiq Chuaq da au, wa Boc Plình da au.”

<sup>29</sup> Chuaq Jêxu doi ca Thôma: “I joq ìh lùì ma jah 'màng aih taiq ìh khoi hnoq Au ùh? Xôq ramõt am ca mangai 'nhòq i hnoq, mahaq khoi lùì Au.”

<sup>30</sup> 'Màng aih, Chuaq Jêxu broq bàc teo halac enh ngìa dèh ca 'bài mangai hõc tiaq, mahaq ùh i achìh ta sech cô. <sup>31</sup> Mahaq khoi achìh biac cô waq ca pì lùì Chuaq Jêxu, Haq Chuaq Crich, Con da Boc Plình, wa nhò manoh lùì aih, oh daq jah rìh ta hiniq Haq.

## 21

### *Chuaq Jêxu ta Braih Diac Raxìq*

<sup>1</sup> Atìq ca bìac cô, Chuaq Jêxu loh mahno dađeh ca mangai hõc tiaq Haq ỏi ta 'bò diac raxìq Ti-bê-ri-at. Haq mahno 'màng cô: <sup>2</sup> I Simôn Pêtrô, i Thôma, (hadai i hiniq: Con Camia), Nê-tha-nên ỏi ta plài Cana, gùng Ga-li-lê, baiq con calô Xê-bê-đê wa baiq mangai hõc tiaq ma 'noiç hòm. Wì haq 'nang ỏi ti dabau. <sup>3</sup> Simôn doi ca wì: “Au lam ranang ca.” Wì doi ca haq: “Nhèn hadai lam broq pajùm ca ìh.” Wì haq loh lam, tõi ta bong, mahaq ðìq ca mang aih wì ùh jah cacleq.

<sup>4</sup> Trùh xrõih xroq, Chuaq Jêxu yòng kenh 'bò diac raxìq, mahaq mangai hõc tiaq ùh canao aih Chuaq Jêxu.

<sup>5</sup> Chuaq Jêxu doi ca wì: “Ô pì con, i jah ca ùh?”

Wì doi ca haq: “Ùh i jah ca cleq.”

<sup>6</sup> Haq doi ca wì: “Pì ca'naih hlàm pah 'ma ca bong beq, pì jah ca.” Wì haq ca'naih hlàm, hi jah ca bàc mech ùh nui dùì dèh hlàm.

<sup>7</sup> Mangai hõc tiaq ma Chuaq Jêxu loq waq ca haq, doi ca Pêtrô: “Aih Chuaq!” Jò Simôn Pêtrô bu tàng dèh bua doi, aih Chuaq, haq drah caxùnh eo, (ma jah 'màng aih haq khi lèh eo), hi khi hadrùc ta diac. <sup>8</sup> Wì mangai hõc tiaq ma 'noiç, chùng bong 'yoh mùt atìq taiq wì ùh i hangai ca 'bò toq leq, ùac jah 200 hagat. Wì dùì tiaq dèh hlàm bình ca. <sup>9</sup> Jò wì mangai hõc tiaq khi tõi ta 'bò, wì hnoq ca phiang enh 'nhèq ca ùnh. Hadai i 'benh mì.

<sup>10</sup> Chuaq Jêxu doi ca wì: “'Ràng ca pì neo ranang jah ta cô.”



<sup>11</sup> Simôn Pêtrô tồc ta bong, dùì hlàm mùt ta 'bò, hlech ta hlàm 'bình ca càn, rèn jah 153 pliang. Ca bàc 'màng cô mahaq hlàm ùh hyah. <sup>12</sup> Chuaq Jêxu doi ca wì: “Lam ta cô caq beq.” Mahaq ùh ì ca mangai hỏc tiaq leq hùà bòch Haq: “Ìh cabô?” Wì ùh bòch, taiq wì khoi loq aih Chuaq. <sup>13</sup> Chuaq Jêxu trùh haten ca wì, yỏc 'benh wa ca am ca wì. <sup>14</sup> Cô yàng piq Chuaq Jêxu loh mahno dađeh am ca wì mangai hỏc tiaq atìq ca Haq rìh hlài enh mangai cachìt.

### *Chuaq Jêxu Anoi Tùang ca Pêtrô*

<sup>15</sup> Jò wì khoi caq gêh, Chuaq Jêxu doi ca Simôn Pêtrô: “Simôn, con Jon, ìh loq waq ca Au yi hnao ca wì cô ùh?”

Simôn doi ca Haq: “Òq. Chuaq ôi, ìh loq, au loq waq ca ìh.”

Chuaq Jêxu doi ca haq: “Ìh am dahwèq caq ca triu con Au oq.”

<sup>16</sup> Yàng baiq, Haq doi ca Simôn: “Simôn con Jon, ìh loq waq ca Au ùh?”

Simôn doi ca Haq: “Joq Chuaq, ìh loq manoh au loq waq ca ìh.”

Chuaq Jêxu doi: “Ìh phai wèq ban 'bài triu Au.”

<sup>17</sup> Yàng piq, Haq doi ca Simôn hòm: “Simôn con Jon, manoh ìh loq waq ca Au ùh?”

Pêtrô loh ca mango jò haq tàng Chuaq bòch khoi piq yàng: “Manoh ìh loq waq ca Au ùh?” Pêtrô doi ca Haq: “Waiq Chuaq, ìh loq diq đổng rìm bìac. Chuaq loq ca manoh au loq waq ca ìh.”

Chuaq Jêxu doi ca haq: “Ìh phai am dahwèq caq ca trùu Au. <sup>18</sup> Au doi ca ìh bàu joq 'nàng, jò ìh òi radam, ìh càt dèh caxi nìt, hi lam trong leq tiaq dèh manoh enh waq, mahaq jò ìh khi craq, ìh jah dèch tì, wa i wì ma 'noiç càt da ìh caxi nìt hi 'ràng ìh ti nòi ìh ùh enh lam.” <sup>19</sup> Chuaq doi bàu cô waq ca Pêtrô loq, haq jah cachit 'màng leq, waq ca Boc Plình jah 'ngah 'ngai lem linh. Khi ca doi bàu cô, Chuaq doi ca Pêtrô: “Lam tiaq Au beq.”

<sup>20</sup> Pêtrô wìh hlài hnoq mangai hóc tiaq ma Chuaq Jêxu loq waq ca haq tiaq wa, aih mangai hóc tiaq ma khi angèn ca Chuaq Jêxu jò wì caq Lè Lam Cwa, ðoìq bòch Haq: “Chuaq ôi, mangai ma blòq ìh cabô?” <sup>21</sup> Jò Pêtrô hnoq haq, Pêtrô bòch Chuaq Jêxu: “Mahaq Chuaq ôi, mangai cô èh 'màng leq?”

<sup>22</sup> Chuaq Jêxu doi ca haq: “Tàng Au enh waq ca haq òi rìh trùh jò Au hlài ta cô, bìac cô i troq cleq ca ìh? Phàn ìh lam tiaq Au beq.” <sup>23</sup> 'Màng aih, i bàu oh daq doi, mangai hóc tiaq cô ùh cachit, mahaq Chuaq Jêxu ùh doi haq ùh cachit. Haq toq doi: “Tàng Au enh waq ca haq òi rìh trùh jò Au hlài ta cô, bìac cô i troq cleq ca ìh?”

<sup>24</sup> Cla mangai hóc tiaq cô raq ma anoi hlài ðìq ca bìac cô wa achìh ta sech cô; wa nhèn loq bìac ma haq khi achìh, aih bàu anoi joq 'nàng.

<sup>25</sup> Òi i bìac ma 'noiç hòm Chuaq Jêxu ma khi broq, tàng achìh hlài tang bìac mòiq, au hèm ðìq ca cớng taneh cô ðoìq ùh nui ðìq ca sech ma jah achìh loh.

lxxxiii

**Sech Hadròih**  
**Sech Hadròih**

copyright © 2020 Wycliffe Bible Translators, Inc.

Language: Hre

Contributor: Wycliffe Bible Translators, Inc.

Published: 2015 Nhà Xuất Bản Tôn Giáo

All rights reserved.

2020-11-17

---

PDF generated using Haiola and XeLaTeX on 13 Jul 2024 from source files  
dated 29 Jan 2022

e5023a07-9831-5256-a315-1cae0f33043d